



طنز لر توپلی

وکالت دغدغه لری

محمد حلیم یارقین



اثر ښک پلگي لري:

اثر آتی: وکالت دغذغه لری
يازووچی: محمد حلیم یارقین
نشر اپتیووچی: بیانی اجتماعی و فرهنگي جعفرمه سی
باسمه نوبتی: اوچینچی، ۱۳۹۸ قویاش بیلی
تنظیم: الماس بیانی بولوت
کاریکاتور: حبیبی
ایمیل: yarqinhalim@gmail.com

بیرینچی نشر: «وطنداران» و «بیلگی» نشریه لری، ۱۳۸۶.

ایکینچی نشر: آیدین افغانستان فرهنگي انجمنی، کابل، ۱۳۸۶.

اوچینچی نشر: بیانی اجتماعی و فرهنگي جعفرمه سی، ۱۳۹۸.

طنز لر توپلی

وکالت دغدغه لری

محمد علیم یارقین





ہزل تعلیم است آن را جدّ شو

تو مشو بر ظاہر ہزلش کرو

ہر جدی ہزلست پیش ہازلان

ہزلہا جدست پیش عاقلان

مولوی بلخی

ہزل تعلیم دیر، اونی جدّ دہب بیلینگ

ظاہریگہ الہنیشنی بس قیلینگ

جدّ ہزل دیر برچہ ہازل آلدیدہ

ہزل جدّ دیر لیک عاقل آلدیدہ

دکتور شفیقہ یارقین ترجمہ سی

فەرست

- كىرىش سۆز ۸-۱۰
۱. ايازدن اۈرگەنىنگلر! ۱۱-۲۲
۲. بارمەسم بۆلمەيدى! ۲۳
۳. «سلام» ماجراسى! ۲۴-۳۵
۴. قربانلىك ۳۶
۵. و كالت دغدغەلىرى! ۳۷-۴۳
۶. خرگۆش! ۴۴
۷. قافىەنى قۇلندن بېرىمىگ! ۴۵-۴۸
۸. قىشلاغىمىزدن كاندىد! ۴۹
۹. تاكسى ماجراسى! ۵۰-۶۱
۱۰. مكان(بيتالخلا)لر رازى! ۶۲-۶۸
۱۱. مېھمل ايشلەتېش ۶۹
۱۲. گرانمايه شاعر! ۷۰-۷۳

۱۳. شعری معمار ۷۴-۷۹
۱۴. ۷۹ آنە تیلنی اونوتمگ!
۱۵. شاعرلر مطایه سی ۸۰-۸۱
۱۶. «تېمورهک» قۇرقووی! ۸۲-۸۴
۱۷. یادداشتلر ماجراسی ۸۵-۸۹
۱۸. تیغ بندلیک ۹۰-۹۱
۱۹. تاقیلر المە شووی ۹۲-۹۴
۲۰. آتەمگە آلیب بارەمن! ۹۵
۲۱. ایگگی مخروط، بیر استوانه! ۹۶-۹۷
۲۲. بالە کیم نیکى؟! ۹۸
۲۳. دعای خیر! ۹۹



اولوغ بېنگرى اتى بىلن

كىرىش سۆز

اۆلكه ميزده، بديعي نثر شعرگه نسبتاً اونچه ليك رواجلنمه گن. بونينگ مهم و اساسي سببلىرىدن بىرى شعرنينگ انسانلر روحياتى همده استاتيك ذوقىگه ماس و اويغون بۆلگنلىگى دىر. شونينگ اوچون، انسان طبيعتى شعرگه كۇپراق مايل بۇلىپ، اونينگ ايچكى توپغولرى، كۇنگىل ايستكلرى همده كېچىنمه لرىنى بيان اېتىش و تصويرلشده اېنگ گۆزل معنوي وسيله بۇلىپ كېلگن. عىناً شو باعث، شعر بوتون عصرلر دواميده انسانلر آنكى، كۇنگلى، قاله بېرسه بديعي اثرلر عالميده رقيبسىز حاكم بۇلىپ كېلگن.

افغانستانده، اۆزبېك بديعي نثرى تورلى سببلرگه كۆره رواجلنمى، اۆته قشاق حالتده قالگن. بديعي ايجادنينگ اوشبو ترماغى اۆزگه توركي يورتلر، اينىقسه توركيه و اۆزبېكستانده قنچه لر رواجلنگن بۇلسه-ده، بىراق افغانستان اۆزبېكلرى مشؤم تبعيضي سياستلر طفىلى انه تىللىريده اۇقىش، يازيش همده مطبوعات و باشقه عاموي اخبار

واسطه لریدن جبراً محروم سقلنگن لیکلری باعث، عموماً بدیعی ایجاد و اینیقه بدیعی نثر بویچه جدا قلاق و قشاق حالده قالب کبتگنلر.

شونینگ اوچون، اؤزبک ایجادکارلری اؤز آنه تیللریده اېمس، بلکه اساساً یات تیللرده ایجاد قیلیب، اؤزگه تیل و ادبیات خدمتیده بؤلگنلر. سؤنگگی اوچ اؤن ییللیک دوامیده گینه اؤزبک تیلی اوچون مطبوعات، رادیو، تلویزیون، مکتبلر، بیلم یورتلر همده علمی مؤسسسه لرده بیرآز اېرکینلیک و قولله ی شرایط اؤرته گه کېلدی. نتیجه ده، ادبی تیلیمیزنینگ تورلی ترماقلری، جمله دن بدیعی ایجاد ساحه سیده هم بیرآز سیلجیشلر کؤرینه باشلادی. درسلیک کتابلر، شاعرلر دېوانی و شعری تؤولملری، علمی اثرلر، خلق آغزه کی ایجاد نمونه لری و باشقه لر نشر اېتیلدی. شونده ی قیلیب، ادبی تیلیمیز و علمی-ادبی آقیم ینگ حیات و ینگ باسقیچلر تامان بؤلگه توشدی. اوروش بلاسی بو اېزگو حرکتلر و اؤسیشگه تؤولیق بؤلدی، افسوس.

افغانستانده، اؤزبک بدیعی نثر ایجادکارلری جدا سناقلی بولیب، شونگه کوره اوشبو ترماقده اثرلر آز و سیلجیشلر هم جدا سېکین بؤلگن. شو باعث، بیز بیر نېچيته قیسقه حکایه و داستانن اؤزگه بیرار مستقل اثرنی بو ساحه ده اوچرته آلمه ییمیز.

اېندی بدیعی نثرنینگ "طنز" ژانریگه کېلسک. بو ژانرده هم اؤته

قالاقلیک و قشاقلیک حکمران. "یولدوز" جریده سیده بورونلر نشر ایتیلگن بیر نېچیتته کیچیک اثردن تشقری، اؤزگه بیرارته کؤزگه کؤرینرلی اثر دپیرلی اوچرهمه یدی. بونینگ هم بیردن بیر دلیلی بدیعی نثر حقیده اېسلب اؤتیلگن سبیلر دیر، البته.

قؤلینگیزده گی بو تۆپلم، اوشبو یؤنه لیشده کؤته ریلگن ایلک کیچیک اڈیم دیر. قاله بېرسه، بو اثرلر یازووچی نینگ اوشبو ساحه ده گی بیرینچی تجربه لری نینگ محصولی دیر. بو کته و میده اثرلر طنزنویسلیک اصوللری نقطه نظریدن کمچیلیکلیگه قره مه ی، طنز علاقمندلریگه مراقلی بؤلر، دېب اومید قیله من.

اېسلش کېره ک، اوشبو اثر حکایه لری اساساً حرمتلی دؤستیم محمد یحیی حفیظی جوزجانی نینگ چوچوک هزل و مطایبه لری نینگ سوژه لری نېگیزی همده اولردن الهاملنگن حالده یره تیلگن. مېن بو عزیز دؤستیم گه اولوغ تېنگریدن ساغلام و بختلی حیات و لبلریده اېسه دایمی تبسم ایسته یمن.

شو اؤرینده "آیدین افغانستان فرهنگی انجمنی" گه اوشبو اثرنینگ چاپ ایتیلیشی گه بېرگن یاردملری اوچون چین کؤنگیلدن منتداریچیلیک بیلدیریب، اولرنینگ برچه اېزگو فرهنگي فعالیتلریگه اولوغ تېنگریدن اولکن یوتوقلر تیلب قاله من. (م. ح. یارقین)

ايازدن اوزگه ننگ لرا

روايت قىلىشلىرىچە، اياز سلطان محمود غزنوي نىنگ سبويكىلى قولى اۋتە چىرايلى و ستاره سى ايسىق؛ سېزگىر و هوشيار؛ حاضر جواب و فراستلى بۇلگن اېكن. بىراق شونگه قره مەى، سلطان محمود نىنگ اميرلىرى سلطان نىنگ ايازگه نسبتاً بۇلگن اۋتە كۇپ مەهرى و ايشانچى گە رشك قىلىپ، اينىقسە اياز نىنگ هوش و فەھمى نى سلطانگە داىما كمسىتىپ، غىبت قىلر اېكنلر. بىراق، سلطان اولر نىنگ سۇزلىگە ايشانمەى، اياز نىنگ عقل و فراستى جدا يوقارى اېكنى گە داىم ايشانر اېكن.

كونلردن بىركون سلطان اۋتيز كىشى اميرى بىلن آوگە چىقىدى. دشتە بۇلگنلر يدە اوزاقدن سوداگرلر نىنگ كتە بىر كاروانى كۇرىنىدى. شونده، سلطان رشكچى و اۋز زىركلىگى گە مغرور اميرلر نىنگ هوش و فراستىلر نى سىنش اوچون اولردن بىرىگە، كذكور كاروان قە يېردن كېلگنلىگى نى معلوم قىلىپ كېلىشىنى بويورىدى.

امير درحال كاروان تامان جۇن ب كېتىپ، بىر پسدن سۇنگ قېتىپ كېلىپ سلطانگە، كاروان "رى" شەھرىدن كېلگىنىنى ايتىدى.
سلطان اميردن: كاروان قە يېرگە كېتىمىش؟ دېپ سۇره بدى.

شوندا امير جوابدن عاجز قاليدى.

كېين، سلطان بو نرسە نى بيلماق اوچون ايگىنچى اميرنى
بيباريدى. او اېسە بارىب سۇرىشتىرىپ، كاروان هندوستانگە كېتر
اېكن، دېب جواب كېلتىرىدى.

كېين، سلطان مذكور اميردن: بو كاروان قنده ي متاع و كالالر
كېلتىرگن اېكن؟ دېب سۇره بدى. امير اېسە جواب بېرالمېدى.

سلطان اوشبو نرسە نى معلوم قىلىش مقصدىدە اوچىنچى اميرنى
جۇنە تىيدى. اوچىنچى امير بارىب، سوداگرلر اېيك، اطلس، عطريات
كېي متاعلرنى كېلتىرگنلىگى نى سۇره ب بىلىپ، سلطانگە كېلىپ
ايتىدى.

سلطان اېسە اميردن: كاروان بو يېردە نېچە كون تورر اېكن؟
دېب سۇره بدى. لېكن امير جوابگە عاجز قاليدى. شوندا، سلطان
تۇرتىنچى اميرنى هم موضوعنى بىلىپ اېلىش اوچون جۇنە تىيدى....
شونداق قىلىپ، سلطان كاروان حقىدە گى هر بىر سۇراغى اوچون
بىر اميرنى بيبارىشگە مجبور بۇلىدى!

كېين، سلطان برچه اميرلرگە قرەب: اېندى سىزلرنىنگ كۇز
اۇنگىزدە شو ايشنى ايازگە بويوره من، دېدى.

بو ايشلر جريانيدە ايازنىنگ حضورى يۇق و موضوعدن هم اصلا
بېخبر. شوندا، سلطان خادملىردن بىرىنى چارلب، اونگە ايازنى اۇز
حضورىگە تاپىب كېلىشىنى بويورىدى.

ایاز، سلطان حضوریگە حاضر بۇلگنیدن سۇنگ، سلطان اونگە
قرەب:

بار، كېلگن كاروان نینگ قە يېردن كېلگنینی معلوم قیلیب كېل!
دېدی.

كۆز اوستیگە سلطانیم! دېب ایاز تېزدە جۇنب كېتیدی.
بیر مدتدن سۇنگ، ایاز قیتیب كېلیب، كاروان قە يېردن كېلیب،
قە یېرگە كېتیشی؛ برچە متاعلری؛ نېچە كیشیدن عبارت اېكنلیگی؛ بو
یېردە نېچە كون قالیشی؛ سلطانگە هم ساوغاتلر كېلتیرگنلیگی؛
غزنیندن هم بعضی متاعلر ساتیب آلیش نیتی بارلیگی و هكذالر كبی
كۆپلپ معلوماتنی شو بیر بارگنیده سۇرەب آلیب، برچە سیننی بیرمە-بیر
سلطانگە سۇزلب بېریدی. بو بیلن، ایاز اۆتیز امیر بیرین-كېتین باریب
بجرگن ایشنی بیر مراتبەدەگینه سۇرەب آلیب بشرتیدی.

شونده سلطان، رشكچی امیرلرگە قرەب:

اېندی ایاز و اۋزلرینگیز ارەسیدەگی فھم و هوش فرقینی بیلگن
دورسیزلر، دېب اولرگە طعنه و ملامت قیلیدی.

هە، عزیز دۇستلر، خدا بېرگن عالی هوش و فراست منە شونداق

بۇلەدی!

مېن دايم ایازنینگ هوش و فھمیگە هوس قیلیب، عایلەدە شو
حکایتتی بالەلریمگە ایتیب بېریب، اولرنی "ایازدن اۋرگە نینگلر!"، "سیزلر
هم ایازدېك زیرک و سېزگير بۇلینگلر!" دېب تشویق و ترغیب

قىلراېدېم. بلكە مېنىڭ شو حرکتلىرىم طفىلى بۇلسە كېرەك، عايلە دە برچە بالەلرېم، حتى آنەلرى ھم ايازنى اۋرنك آلىب، ھوشيار و زىرك بۇلىشكە اىنتىلىب قالدىر! نتيجه دە، ھر بىرىگە بىرار ايش بويورگن آدمى، ايشكە باغلىق اۋنل ب مىدە-چويدە سواللرگە كۇمىب تىشلا اېدىلر.

قرەنگ كە شو يۇسوندە كۇپىنچە بىرار ايش بجريلىشى اوچون بېش دقيقە وقت كېرەك بۇلسە، اونگە تېگىشلى بېرىلەدىگن سوال و جوابلر ۱۵-۱۰ دقيقە، گاهيدە يريم ساعت و حتى كە اوندىن ھم كۇپراققە چۇزىلىب كېتراپدى!

اېنگ يمانى شو بۇلدى كە، بو يىنگى عادت طفىلى بجريلىشى جدا شاشىلىنچ و ضرور بۇلگن ايشلرگە ھم اويدە گىلر پروا قىلمەي، او حققە اول تورلى سواللرگە جواب آلىب، كېين اونى بجريشكە كىرر اېدىلر.

بو عجايب عادت، بوتون قوم-قرىنداشرگە معلوم بۇلىب، كېزى كېلكندە اولر كۇپىنچە بىزىنىڭ بالەلرېمىزگە ايش بويورىشدىن چۇچىب تورر اېدىلر. چونكە ايش بويورگن زھاتى اولرنى اۋنل بۇلمە غور سواللرگە كۇمىب تىشلا، حوصلەلرېنى پىر قىلىب، توبەلرېگە تەينتېرىب قۇير اېدىلر!

بولردن تشقرى، بالەلرېمىز كودكستان و مكتبەدە ھم معلملرېنى كۇپ سواللر بېرىب، قىيىناققە قۇيگنلرى حقيدە ھم خبر كېلىب تورر

ابدی.

بونى قرەنگ كە، تۇنغىچ اۋغلىمىزنىڭ ادارە دە گى ھىمكارلرى،
اينىقسە اونىڭ رەئىسى ھىم قچان كە اونگە ايش بويورسە، سناقسىز
سواللرلرگە گرفتار بۇلىپ، ايشچنلىگى و قابلىلگى گە قرەمەى اوندن
زېرىكىپ، حتى ناراضى بۇلگن اېمىشلىر. كېلىنىمىز حقىدە گېيرمسك
ھىم بۇلەدى. چونكە او ھىم آز-ماز شو عادتگە يۇلىققىدىن تشقرى
بىچارە، اېرى نىڭ سواللرى قىيناغى گە چىدالمەى، ھفتە دە بىر نېچە
مراتبە آتەسىنىڭ اويىگە قاچىپ كېتىشگە مجبور بۇلر اېدى.

كەتە قىزىمىزنى نىمە دېسىز! اونىڭ شو عادتى طفىلى
كياويمىزنىڭ جانى بۇغزىگە كېلىپ، بىر نېچە بار قىين آنە سىگە
كېلىپ، خاتىنىدىن شكائت قىلگن و اونگە بىراز نصيحت قىلىشىنى
التماس قىلگن.

بىلە سىزىمى نىمە بۇلگن؟ ھە، قىين آنە ھىم اۋرگە نىب قالگن
عايلوي عادتگە كۈرە، اۋز نوبتىدە بىچارە كياونى سواللر قىيناغى گە
اىلىپ، قاچىرىدى!

قىزىغى شو كە، كياويمىز اېندى تۇرت ياشگە كىرىپ، چىرايلى
گېيرەياتگن اۋغىلچە سىنى ھىم قىزىمىز خودى شو عايلوي عادت بىلن
تربىلەياتگىدىن جدى تشويشە اېكىنى ھىم قىين آنە سىگە ايتىدى!
بو عذابلردن اۋزىم ھىم بې نصيب قالمە گن من. لېكن ھىر حالدە،
بالە لرىم شونداق سېزگىر و زىرك بۇلىپ تربىلە تاپگنلرىدىن قووانىپ

يورىمىن. اخىر نىمە بۇلسە ھەم، اولر بويوريلگن ھەر بىر ايشنى اول ايجىنگ-بىيجىنگى گچە بىلىب آلب، كېين اونى و حتى اونگە تېگىشلى باشقە بىر نېچە ايشنى ھەم يخشىلب بجرىشگە اۋرگەنىب قالگنلر-دە!
خوب عزيز دۇستلر! بلکہ مېنىگ بو سۇزلىمگە ايشانمەى، اولرنى مبالغە، دېب تورگن سىزلر! اونداق بۇلسە، مېن اۋزىم نىنگ باشىمدن اۋتگن اۋنلب واقعه لردن فقط بىرته سىنى سىزلرگە حكايت قىلىب بېرە من. اونى اۋقىب، بلکہ سۇزىمگە ايشانسىز، دېگن اومىدده من.

بىر كونى كوتىلمە گندە اويىمىزگە مېمان كېلىب قالدى. "مېمان حىب خدا" دېگنلرى و مېماننازلىك رسم-عادىمىزگە كۋرە، اولر نىنگ حرمتى گە باشقە بىمك-اىچمكلر قطارى، قابلى پلو بىشىرىش ھەم كېرەك اېدى، البته.

قرە نىگ كە، شوكونى اويده گۋپت قالمە گن اېكن. شوباعث، خاتىنىم بازاردن تېزدە گوشت كېلتىرىش ضرورلىگىنى ايتىب، مېندن سۇرەى باشلەدى:

آتەسى، قابلى قىلەى مى يا كە چلو؟

قابلى يخشى.

كنجد ياغىده بۇلسىن مى يا بازارنىنگ نباتى ياغىده؟

كنجدده بۇسىن!

پىازداغ قىلە مى يۇق مى؟

يۇق، پيازداغ ساغليككه ضررى بار اېمىش!
وطنى برنجدن مى يا پاكستانيدن؟
مىلينگىز!
زرجامه و ميبىزى كۇپ بۇسین مى يا كمراق؟
الته مهمان بۇلگنده همه نرسه سینی یخشیراق قیلیش كېره ك-
ده خاتین!

شونداغ بۇلسه، پسته و بادام هم ساله ی مى؟
بونى اۇزینگىز بيله سىز!
بوغ قزانده پيشيره مى يا چوین قزانده؟
واى توبه! قيسى قزانده پيشيريشنى هم مېندن سۇره ی سىزمى؟!
مهمان كۇپ بۇلسه، بوغ قزانده سیغمه یدى-ده!
مهمانلریمیز تۇرت كیشی. اۇزیمیز و باله لریمیزنى هم حسابگه
آلینگ!

قچانگه تيار بۇلسین؟
پېشین نمازیدن كېین، ساعت بیر-بیر یریملرده تيار بۇلسه،
یخشی بۇله دى.

?...

!...

اويده باله لریمیزدن اېنگ كېنجه سى ارسلان بار اېدى. اتفاقاً بو
كېنجه تايیمیز آپه-اكه لریگه نسبتاً زیركلیك و هوشیارلیكده (ایاز

بۇلىشده!) كۇپراق اىنتىلووچن و شو بىلن بىرگه، اىش بويورىلگنده جدا هم كۇپ سواللر بېره دىگن اېدى. مېن اېسه اونى آلدىمگه چقىرىپ، كېره كلى پولنى بېردىم و بازارگه بارىپ گۇشت آلىپ كېلىشىنى بويوردىم.

اۇغلىم: خوب بۇله دى آته جان، دېب كېتدى. مېن بۇلسه مېمانلر آلدىگه بارىپ، اولر بىلن گپله شىب اۇلتىردىم. بىر پسدن سۇنگ، ارسلان قىتىپ كېلىپ، مېنى ايما بىلن تشقىرگه چارله دى. مېن مېمانلردن عذر سۇره ب تشقىرگه چىقدىم. ارسلان سۇره دى:

آته جان شو حاضر باره مى؟

هه اۇغلىم، شو حاضر و تېزده بارىپ كېل!

گۇشت پاده نىكى بۇسىن مى يا قۇى نىكى؟

پاده نىكى بۇسىن اۇغلىم!

نر بۇسىن مى، ماده؟

ماده نىكى تېز پىشمه يدى، نر بۇسىن -ده!

شو بىلن ارسلان جۇنه دى و مېن اېسه ينه مېمانلر آلدىگه باردىم و صحبتىمىزنى دوام اېتتىردىك. هه، مېمان اۇغلى بو بىل لىسه نى توگه تىب، كانكور بېرماقچى لىگىنى آىتىپ، مېندن قىسى فاكولته نى تنلسه يخشى دىر، دېب سۇره دى.

شونده مېن اوندىن سۇره دىم:

اۇغلىنگىز نىنگ سويه و استعدادى قنده دىر؟

یخشی، دوم نمره کامیاب بۇلگن.
کورس-مورسگه باریب، تیارلیک آلگن می؟
هه، ایکی ییلدن بیری اۇقیب یورگن!
اۇزی قیسی رشتەنی یاقتیره دی؟
ژورنالیزم نی!
سیز-چی؟
حقوق-دیپلماتیک رشتە سی.
آنە سی-چی؟
داکتر بۇسین، دېب توریب آلگن!
؟؟...
!!...

انه شونده ی قیلیب، ایندیگینه مهماننی آز-ماز "سوال پیچ"
قیلیب، قزیب اوچ-تۇرت دقیقه اۇتگچ ایشیکده ینه ارسلان تاپیلدی!
مېن بۇلسه ناچار صحبت و سۇراقلیریم نی قالدیریب، ینه تېزده
مهمانلردن عذر سۇرەب، تشقیریگه چیقیدیم.

هه اۇغلیم! بازارگه کېتمە دینگ می؟ دېب سۇرەدیم.

آته جان گۇشت سویکلی بۇسین می یا لحم؟

لحم قیمت، سویکلی بۇسین!

یاغلیغ بۇسین می یا یاغسیز؟

بیله سن-کو، یاغ مېنگه یاقمه یدی. شو اوچون یاغسیز بۇسین!

اۋغلىم، خوب بۇلەدى، دېب نظرىمدن غايب بۇلدى. مېن اېسە
اۋزىمچە شكر تارتىب: خىرىت، گلگى(نوبتدە گى) سۇراقلردن قوتىلدىم،
دېب مېمانلر بىلن اوزىلىب قالگن صحبت موضوعىمىزنى دوام
اېتتىردىك. ھنوز موضوعگە يىخسى كىرمە گن اېدىك، اېشىك
آستانەسىدە ارسلان ايگى قۇلىنى پتلونى نىنگ چۈنتگى گە تىققن حالده
ىنە سۇررەيىب نمايان بۇلدى.

مېن اېسە اونىنگ سۇراقلرى باشلە نىشدن آلدىن، تېزدە
مېمانلردن عذر سۇرەب تشقىرگە چىقىب، اوندن:
ھە، سېن ھالى ىم شو يېردە مىسن؟ دېب اچىق بىلن سۇرەدىم.
او بۇلسە:

حاضر كېتە من آتە جان. شونى بىلماقچى اېدىم، گۇشت پلولىك
بۇسىن مى يا شۇربالىك؟ دېب سۇرەدى.
اې بالە، نىمە بلاسن اۋزى! پلولىك بۇسىن. مېمانگە آنەنگ پلو
قىلەدى، دېدىم اچىق بىلن.

ارسلان اچىغىم گە پروا قىلمەى سۇرەدى:

سان بۇسىن مى قۇل؟

سان بۇسە يىخشىراق!

اىلىكلى بۇسىن مى يا عضلەسىدن؟

پادەنىنگ اىلىك سويگى كتە و آغىر بۇلەدى.

قىيمەلىك آلەى مى؟

يۇق، كېرەك اېمس!
كۆكتلر(تركارى) كېرەك اېمس مى؟
ھەمەسى اويدە بار!
مېوۋە-چى؟
او ھەم بار!
نان-چى؟
بار!
كۆك و فانتا كېلتىرەى مى؟
كېرەك اېمس!
.....؟؟؟؟
!!!!....

اويىمىز آلدېدەگى قصابدن آلەى مى يا مندوى كېتەى مى؟
شوندە غضبىم قىنب:

اى، نېمە بلا بۇلدى سېنگە. كېچىكتىرىپ يىباردىنگ-كو! تېز باركە نېنگ شو مى؟! يۇقال كۆزىمدىن! تېزدە شو يېردەگى قصابدىن آلىپ تېز قىت، دېب اونگە بقىردىم. او اېسە كۆچە تامان اۇقدېك آتېلىپ چىقىپ كېتدى.

مېن اېسە چوقور بىر نفس آلىپ، اۋزىمنى قۇلگە آلدىم و مېمانلر آلدېگە كىرىپ گېلەشىپ اۋلتىردىم.

خۇش عزيز دۇستلر! منە ھركونى عايلە مىزدە يوز بېرە دىگن

اۋنلب واقعه دن و تېزراق توگه گنلريدن بىرى اېدى. بىر ساعت يا
كۋپراق چۈزىلگنلريگه نيمه دېيىسىز؟ بلكه اېندى سۈزلريمگه ايشانگن
بۇلسنغىز كېرەك-؟!

(تاشكېنت: 2005/۱۳۸۴)



بارمە سەم بۆلمەيدى!

مىرزا اكە بېش-آلتى يىل مەھجرتدن كېيىن وپنەگە قىتىپ كېلگەن
ئېكەن. دۈستلىرىدىن بىرى ئو كىشىدىن سۈرەبدى:

مىرزا اكە، مەنە شرايط تاقاسى بىلەن بېش-آلتى يىل چەت
ئەللەردە دركسىز بۆلىپ كېتىدىنەن. اگر شو مەتدە قوملىرىنەن: مىرزا اكە
ئادەك بۆلىپ كېتەدى، ئۆلىك-تېرىگەن ھېچ بىر خەت و خەبەر بۆلمەدى
يا ئۆلدى، دەپ عىالىنەن ئۆز راضىلىقى بىلەن قوشنىلىرىنەن
بىرىگە نەكەل بېرماقچى بۆلگەنلەردە، سىز ئۆشە نەكە تۈبى آقشامى
تاپىلىپ كېلسەنەن، تۈبەگە خەبەر قىلسەلەر بارمەيدىنەن يا ئۆتەمى؟

مىرزا اكە ئوزاق مەت سەكوتەگە كېتىپ ئۆلەپ، نەھەت:

قوشنىچىلىك، بارمە سەم بۆلمەيدى، دەپ جەواب بېرىدى!!

«سلام» ماجراسى!

بىر-بىرىگە سلام بېرىش و بو بىلن حرمت و احترام بجا كېلتىرىش انسانلار ارە سىدە جدا قديم زمانلردن بويان عادت بۇلىپ كېلگنلىگى ھمە مىزگە معلوم. سالاملىشىش تورلى خاقلردە تورلىچە شكل و يۇسىنلردە بجرىلەدى.

بعضىلار اۇنگ قۇللرىنى كۇتەرىپ، بىر نېچە مراتبە سېكىن حرمت بېرسە لردە، باشقە لرى اېسە قۇللرىنى كۇكسلىرىگە قۇيب، باشلرىنى كۇزلنگن تامانگە استە اېگىپ قۇيە دىلر. غرب مملكتلرىدە اېسە، قديمدە اېرككلر كلالەلرىنى باشدن االىب، اونى قىتە باشگە قۇيش بىلن و عياللر اېسە، اېتكلىرىنى اوشلب، تزه لرىنى بىراز بوكىب اوشبو مراسمنى بجا كېلتىرر اېكنلر.

قرە نىگ، بوگونگە كېلىپ آدملىرىنىگ كۇپراق باش يلىنگ يورىشلىرى و عياللر كلتە-كولتە اېتكلى كۇيلىك يا كە اېرككلردېك پتلون كىيگنلىرى باعث، بو طرزده گى سالاملىشىش ھم اونوتىلىپ بىبارىلىدى. قىزىق-كو! حتى سالاملىشىش يۇسىنى ھم زمان شرايطىگە كۇرە اۇزگرىشى ممكن اېكن!

بىز مسلمانلر اېسە "السلام عليكم!"، دېب حرمت كۇرسە تە مىز.

مقابل كىشى ھەم "وعلىكم السلام!" دېب جواب قىتە رەدى. بعضى آدمەر "سلام!" دېب مقابل تامان ھەم "سلام!" و گاهى "وعلىك!" دېب اۆتەبەرەدىلەر. بعضىلەر اېسە شاشىلگەندىن مى يا كە حوصلە سىزلىكەندىن مى و يا ھەم عادت طفىلى مى، ايشنى آسان قىلىپ، فقط "سە!" دېدىلەر و مقابل تامان ھەم اولرگە اېرگە شىب "وع!" دېب قۇيەدىلەر!

ھەرحالدا، سالاملىشىش انسانلرنى بىر-بىرلرى بىلەن دۇستلە شىب قالگنى، حتى كە كۆپ عايلەلرنىڭ قورلىشى گە سەبب بۇلگىنى ھەم كۆپ كۆرىپ، كۆپ اېشىتگەن سىزلەر. عكسىنچە، كىشى اۆز تانىشىدىن اونگە سلام بېرمەي، اعتنا قىلمەگەنلىگى باغث رەنجىپ يورگىنى ھەم كۆپ كۆرگەنمىز.

كۆرىپ توريپ سىز، بىرگىنە "سلام" نىڭ اۆزى انسانلەر حياتىدە قىچەلر اۋرنى و اھمىتى بار. اېندى اگر سىزگە بىراو "سلام" دن قىينەلىپ، سىرسان بۇلىشى مەكەن دەسە، نىخات كە ايشانمە سىزگىز؟! لېكىن شو گەپ حەقىقت. چۈنكە اوزاق كېتمە يلىك، مېنىڭ اۋزىم "سلام" طفىلى جدا قىينەلىپ سىرسان بۇلگەن مەن. سۆزىم چىن، ايشانىڭ!

مەن اېندى باشىمدىن اۋتگەن واقەنى ايتىپ بېرىم، يقىن كە ايشانە سىز.

مېن عايلەم بىلەن بىرگە شەرچە مېزىنىڭ بىر چېتىدە جايلىشگەن قىشلاقدا يىشەيمەن. اۋزىم اېسە شەر مەكتەپلرنىڭ بىرىدە اۋقۇتتۇرۇپ

بۇلىب ايشله يمن. قيشلاق بيلن شهر اره سى تقريباً 5-6 كيلومتر كبله دى. شهر بيلن قيشلاق اۋرتە سیده كۆركم و يم-يشيل باغلىر جايلىشگن و بيز قيشلاقليلكلر ايسه يگانه باغكۈچه يۇل ارقه لى شهرگه بارىب كبله ميز. باغكۈچه نينگ ايكى يانیده كۈچه بۇيى دايم شيلديره ب آقيب تورگن اريق و چنار كىبى درختلر آسمانگه قد كۈترگن.

مېن دايم باغكۈچه دن يورگنيم ده، جدا مزه قىلىب، اۋزىمنى راحت سېزه من. چونكه يۇل نينگ ايكى تامانیده گى درختلر قطارى خودى اولوغوار بير مهماننى پيشواز آلىب تورگن آدملىر صفى دېك نظرده تويولىب، يفراكلرى اره سيدن شمال ايسىب، اولر حركتيدن پيدا بۇلگن عجايب تاووشلر خودى حرمتلى مهمان پيشوازيگه موزيك چلينگن دېك سېزيله دى!

هركونى باغكۈچه دن يورىب مکتبگه بارىش، ايشيمگه كوچ و الهام بېرىب، قيتيشده ايسه چرچاغلريم نى كمه يتيرىب، راحت بغيشله يدى.

شونداق قىلىب، تشويشسىز و خاطرجمع بير نېچه بيلدن بېرى اۋقووچيلرنى جان و دليم بيلن تربيه لب يورگن اېديم.

بیرکونى اېرتە لب سېويملى باغكۈچه دن كېتە ياتگنيم ده، حويليلردن بېرى نينگ اېشىگى آلدیده ۴-۵ ياشلى چيرايلى بير باله نى كۈرديم. مېن اونگه يقين يېتگچ "السلام عليكم!" دېب ميين، سيرين و جرنگلى سېس بيلن مېنگه سلام بېردى. مېن ايسه بې اختيار

ایلجه ییب، تبسم بیلن درحال "وعلیکم السلام!" شیرین باله، دهب اونینگ باشینی سیلب، آفرینلر ایتیب یؤلیمنی آلیب کبتدیم. یوره گیلمده باله نینگ آته-آنه سیگه مینگ رحمت دبدیم.

ایکینچی کونی ابرته لب ایشگه کپته یاتگنیمده باغکؤچه ده ینه اؤشه شیرین و یاقیمتای باله نی کوردیم. او ینه یاقیملی و شیرین سبسی بیلن مینگه سلام بپردی و مین بؤلسه "علیک" الیب، باشینی سیلب تشویقلر قیلیب، اؤتیب کبتدیم. بو ینگی واقعه باغکؤچه دن آله دینگن لذتیمنی ینه هم آشیردی!

اوپنچی کونی ابرته لب ینه باغکؤچه دن کپته یاتگنیمده، اوزاقدن کؤزیم اؤشه باله گه توشدی. بیراق بو گل (دفعه) او یکه اېمس اېدی. بلکه اؤزیدن قریب بیر یا ایکی یاش کته راق آپه سینی هم بیرگه آلیب تورگن اېدی. مین اولرگه یقین بارگچ، ایکله سی قوش آواز بیلن "السلام علیکم!" دبدیلر. مین اېسه "وعلیکم السلام!" دهب جواب بېریب، کپچیککنیم اوچون تۆخته مسدن اؤتیب کپتماقچی بؤلیم. شونده زیرک و یاقیمتای باله مینگه:

عمکی، آپه م نینگ سلامی نی "علیک" آلمه دینگیز-کو! دېدی. مجبور اؤگیریلیب باریب، "وعلیکم، یخشی قیزچه، برکه الله!" دهب یؤلیمنی آلیب کپتماقچی بؤلگنیمده، باله ینه مینگه:

عمکی نیمه اوچون بوگون باشیمنی سیله مه دینگیز؟ دهب سؤره دی.

خۇش اۋغلىم، دېب بالە نىنگ باشىنى سىلب تېزدە جۇنە ماچقى
بۇلىسم، بالە يىنە:

آپەم قالدى-كو، دېدى!

هە، كېچىرىنگلر، دېب آپە سىنىنگ باشىنى ھەم سىلب، بر كە اللە
يخسى قىزچە، دېب يۇلگە توشدىم.

شوكونى مەكتەبگە بىرىنچى بار ۱۰ دىقە كېچىكىب بارگىم
بۇلدى.

باشقە كون بىراز وقتراق اويدىن چىقدىم. چونكە شەردە بىر
كىشىنى كۇرىب، كېىن مەكتەبگە بارىشىم كېرەك اېدى. باغكۇچە نىنگ
اۋرتە سىگە يېتگىنمەدە قرەسم، اۋشە بالە، آپەسى و يىنە اىكى بالە بىلن

تۇرت كىشى بۇلىب، مېندىن آلدىنراق كېلىب تورگن اېكنلر!

قرەنگ، بالەلر "سلام" بېرىش شوقىدە آلدىندىن كۇچەگە چىقىب،
مېنى كوتىب تورگن اېكنلر!

مېن اولرگە يقىن بۇلىشىم بىلن آق ھەملەلى بىرىن-كېتىن مېىن و
ياقىملى سېسلرى بىلن سلام بېردىلر. مېن ھەم اولرنىنگ سلاملىرىنى
نوبىت بىلن "عليك" آلىب، باشلىرىنى سىلب، آفرىن و بر كە اللەلر ايتىب
تېزدە اۋتىب كېتىدىم. اولر ارە سىدە اېنگ كىچىگى "س" حرفىنى
يخسى ايتالمەى "ش" طرزىدە شىرىنگىنە "السلام!" دېگنى جدا ھەم
مېنگە ياقىب كېتىدى!

بىركونى قطار تورگن بالەلرنىنگ سلاملىرىنى "عليك" آلىب،

باشلرينى سىلش و تشويقلر قىلش ايشلرى توگب، ايندى كېتماقچى بۇلگنيمده اولردن بىرى:

عمكى، سىزىنىڭ ھەم بالەنگىز بارمى؟ دېب سۇرەب قالدى!
بو، مېن اوچون كوتىلمەگن سوال اېدى. چونكە تۇيىمىزدن آلتى -يېتى يىل اۇتىب، قىچە لر بالە آرزو قىلگن بۇلسك ھەم، بىراق حالىگچە ھەم بالەلى بۇلمەگن اېدىك. بو سوال نىمەگە دىر يورەگىمى تىرنەلب قۇيدى. اما پروا قىلمەي، پس آواز بىلن:
يۇق، دېب جواب بېردىم و باشقە سۇراققە توتمسلىكلرى اوچون تىزدە شەر تامان ھەركەت قىلدىم.

ھە، عزيز اۇقووچىلر! ھەركون اۇتىب سلام بېرەدىگن بالەلر سانى آرتىب بارىب، شونگە نسبتاً "عليك" ايش، اولر نىڭ باشلرينى سىلش و تشويقات وقتى ھەم كۇپە يىب كېتدى. نتيجه دە مېنىڭ مەكتىبگە كېچىكىب بارىشىم ھەم آرتىب، عادتى حالگە ايلەنىب قالدى! بو اېسە ھەمكارلرىم، اينىقسە مەكتەب مەدىرىنى ھىرت و تشويشگە سالگن اېدى.
بىركونى مەدىر مېنى اۋز ھۇزورىگە چقىرىب، كېچىكىكنلرىم اوچون ھوشدار بېرىب، اونىڭ باغىنى سۇرەدى.
اونگە مۇسۇعنى قىسقە چە قىلىب ايتىب، باغكۇچە نىڭ بالەلرىدن واز كېچەلمەگنىمى ھەم ايتدىم.

مەدىر اېسە بىرآز عىبانى بۇلىب، بو قىنداق ايش، "بىر قۇلدە ايكى تىربوزنى آلىب بۇلمەيدى" دېگن نەقلىنى اېشىتمەگن سىز مى؟ دېدى.

مېن اوندن عذر سۇرەب، "سلام ھم فرض، عليک ھم فرض" -
كو! دېدېم و بوندن بويان اۋز وقتىدە ايشگە كېلىشگە كۇشش قىلەمن،
دېب وعدە بېردېم.

بونداق ھوشدارلر و اخطارلر مکتب مدیری تامانیدن ینه بیر نېچە
قتلە تکرارلندی. بیراق، مېن بالەلردن کۈنگیل اوزالمس اېدیم!
بالەلر سانى اېندى ۱۰ کیشیگە یتگن اېدى. بعضى کونلری
شهرده ایشیم بۇلگنده، بیر نېچە بار بالەلرنینگ "سلام" لریدن قوتیلیش
اوچون اویدن یریم ساعت یا 45 دقیقه وقتلی راق چیقیشگە ھم
اوریندیم. بیراق، علاجی بۇلمەدى. چونکہ بالەلر سېزىب مى یا کہ
شوق و ذوقدن مى، مېندن ھم ایلگىریراق کۈچەگە چىقىب تورر اېدیلر!
مېنگە، گۇيا آتە-آنەلری بالەلرینی سالملشیش نی پۇختە اۋرگە نیش
اوچون شو پېرگە بیبارگندېک تویولر اېدى!

بیرکونی اطرافیمده تۇپلنگن بالەلر و اولر بیلن سالملشیب
تورگنیم نی اوزاقدن کوزە تیب تورگن بیر چال، اونینگ آلدیگە یتیب
بارگنیمده، مېنگە:

اۋغلیم، بالەلرگە شیرینلیک بېرەياتگن اېدینگیزی می؟ دېدى.
یۇق، سالملرینی "عليک" آلهياتگن اېدیم، دېب جواب بېردیم.
آفرین، برکہ الله اۋغلیم! بالەلر تربیەسى اوچون جدا خیرلی ایش
قیلر اېکن سیز-دە. بو ایشینگیز بالەلرنینگ کېلەجک شخصیتی اوچون
یخشی پایدېوار بۇلەدى. خدا خواهلسە، اېرتەگە اوچتە نېرەم نی شو

بېرگە بېيارەمن، يىخشىلب سلام بېرىشنى ئورگىنىنلر، دەدى!!
مېن اېسە قىلە دىگن ايشىمدن جدا ممنون بۇلىب، او كىشىگە
تشكر دەپ قۇيدىم.

بونى قرەنگ كە، بالەلر كۇپلىگى باعث بىرارتەسى نىنگ سلامى
جوابسىز قالگندە، او ئورتاقلىرى ارە سىدن يارىب چىقىب، حتى بعضاً
يىغلب جواب ئالدى! لېكن شونداق بۇلسە هم، اولر مېنگە ياقراپدىلر و
بوندى لذت ئالراپدىم.

بىر كۈنى ئېرتەلب يىنە باغكۈچەدە كېتە ياتگىنم دە سلام بېرووچى
كىچىك دۇستلىرىمدىن ھىچ بىرى كۈزگە كۆرىنمەدى. حىران و
يۈرەگىم غىش بۇلىب كېتە ياتگىنم دە، توستىدىن (ناگھان) اولردىن بىرى
درخت پىنە سىدىن چىقىب، مېنى كۆرىب قالدى. او حويلى لردىن بىرى
تامان يۈگۈرىب، بلند سېس يىلن:

آھاي بالەلر، چاپىنگلر! "ئىلىك" ئالە دىگن عمكى بىز كېلاتىدىلر!
دېب كېتەمە- كېت قىچقىرە باشلەدى.

اۋشە زھاتى (لحظە)، حويلىلر نىنگ بىرىدىن بالەلر تۇپ (گروە، گلە)
بۇلىب كۈچەگە يۈگۈرىب چىقىب، سلام بېرىشنى باشلەدىلر. گۇيا بالەلر
مېن كېلگۈنچە، يۇلدە بىر كىشىنى قراوول قۇيىب، مېنىنگ
كېلە ياتگىنم نى كۆرىب اولرنى خېردار قىلىش وظيفەسىنى تاپشېرىب،
اۋزلىرى اېسە بېمەللەل اۋىنب اۋلتىرگن اېكنلر!

بوكون بالەلر اېچىدە حتى كە اوپىلرېگە كېلگن مېھمانلر نىنگ

باله لری هم بارلیگی معلوم بۇلدى! بو گل، سلاملشیش و باش سیشلر و آفرینلردن تشقرى، اولریننگ تورلى سواللریگه جواب بېرىشگه هم مجبور بۇلدىم. اخیر اۇزینگیز اۇیلنگ، شونداق یاقیمتای و آدابللی باله لرنینگ سواللرینی قنداق قیلیب جوابسیز قالدیره آلر اېدیم؟!

هه، شونینگ اوچون اۇشه کونی 45 دقیقه کېچیکیب مکتبگه باردیم. قره سم، مکتب اېشیگی آلدیده مدیر بیلن سر معلم عصبانی حالتده مېنگه منتظر تورگن اېکنلر. مدیر سلامشدن سۇنگ، یوزیمگه دقت بیلن قره ب، ناراض آهنگده:

کسل می سیز؟ دېب سۇره دی.

یۇق! دېب جواب بېردیم.

اقتصادی مشکلینگیز بارمی؟

یۇق!

اویده یا که قیشلاقده بیرار جنجال چیقدی می؟

یۇق، تینچلیک!

خۇش، اونده نیمه اوچون انچه دن بېری هرکونی مکتبگه کېچیکیب، اۇز وقتیده درسینگیزگه کباللمه ی قالدینگیز؟ یا که ینه اۇشه باغکۇچه ده گی باله لر بیلن اوشله نیب قالدینگیز می؟

شونده، یوره گیم تۇلیب هه، دېب جواب بېردیم.

مدیر اېسه اچیق بیلن دېدی:

هرکونی کېچ کبلگنینگیز درس و مکتب نظمی گه زیان

يېتەكە زىب، اۋقووچىلارنىڭ ۋاقتىنى ضايع قىلە ياتىدى. اېندى سىز،
باغكۈچە بالەلرى يا كە مەكتەدىن بىرىنى تەنلەنگ! چۈنكە بو كېچىكىشلەر
بارىب-بارىب بىر ساعەتدىن ھەم ائشىشى تورگەن گپ!
سەرمەلم: بو مەشكەلنى ھەل قىلىش اوچۇن بىرەر چەراھ يۇق مەيكن؟
دېب سۇرەدى.

مېن اېسە اولردن: بو ھەقە نەمە مەصلەت بېرماقچى سىزلەر؟ دېب
سۇرەدەيم.

مەدىر: بىر تە بايسەكلى ائىب، كۈچەدىن تېزدە تۇختە مەسدن ھەيدەب
اۋتەسنىگىز بۇل مەيدى مى؟

بونى علاجى يۇق. چۈنكە بالەلر بىلەن كۈز مە-كۈز بۇلگەن مەدە،
قەنداق قىلىپ اولرەننىگ ائەيدىن اۋتە مەن؟ اھىر، ھەم يورە گەيم بىرەش
بېر مەيدى، ھەم اءادەدىن اېمەس-كو! اوندىن تەشقرى، اولر يۇلەم نى
تۇسسەلەر-چى؟ يۇ-يۇق، شىرىن بالەلرنى مائوس قىلگەيم يۇق، دېدەيم
قىغۇ بىلەن.

سەرمەلم: اوندە بىرەر مۇتەر ائىنگ!

نەمە دەيسىز، مۇتەر ائىگە قەنى پۇل؟

مەدىر ائەدى: اوندە شەرگە كۈچىب كېلەنگ!

بونىنگ ھەم علاجى يۇق. مەل-ھال و اېكىن ائىشلىرىنى

تەشەببىمى؟

شۇندە مەدىر: بۇل مەسە يورەنگلەر، بو مەشكەلگە قەقۇ عاقل بېك بىرەر

چاره تاپىب بېرر، دېب بيزنى اداره سيگه تامان باشلب آلىب كېتدى. عاقل بېك آتى گه مانند جدا زيرك، چقان و اوده برار همكارلر يميزدن اېدى. مکتبىمىزده چقان كه بىرار قىين مسأله يا مشكل تاپىلگودېك بۇلىب، باشقه لر اونى يېچالمه ي عاجز قالگنلر يده، كۇپىنچه عاقل بېك نىنگ هوش و تدبىرى بىلن حل قىلنر اېدى. شو باعث، كۇپىنچه او كىشىنى هزل بىلن "مشكل كشا" دېر اېدىلر. بىرپسدىن سۇنگ اوچو كىشىلىك مجلسى مىزگه عاقل بېك هم كېلىب قۇشىلدى. مدير اونگه مېنىنگ مشكلىم و اۇرته گه قۇيىلگن پىشنهادرلر و چاره لرنى هم قىسقه چه ايتىب بېردى. عاقل بېك موضوعنى يخشى توشونىب آگچ، بىراز اۇىلب: بو مشكلنى حل قىلىش اونچه لىك قىين اېمس، دېدى او بىزلرگه قره ب.

قنداق؟ دېب سۇره دى مدير.

فقط بو كىشى گه بىراز قىين بۇله دى، دېدى كۇرستگىچ برماغىنى مېنگه قره ته اشاره قىلىب.

قنى اېشىته يلىك-چى! دېدى مدير ذوقلە نىب.

گپ شو كه، بو كىشى نىنگ قىشلاغىدن شېرگه، باغكۇچه دن تشقرى بىرته بىرايه يۇلك هم بار. لېكن، او يۇلك نىنگ مسافه سى بىراز كۇپراق و تقريباً باغكۇچه نىنگ ايگى برابرى كېلسه كېرەك. مېن بىر نېچه قتله او يۇلدن اۇتگن من. دۇستىمىز انه شو يۇلدن شېرگه

باریب كېلسەلر بۇلەدى.

بو فكر ھەمە گە معقول بۇلىب، مېن ھەم يورە گىم بۇلر-بۇلمس ناچار كۇندىم. اېرتە سىدن باشلب، مېن سېوىملى و ياقىملى باغكۇچە دن اېمس، بلكە سۇقماق(بېراھە) يۇلكدن شەرگە بارىب كېلەدىگن بۇلدىم.

شونداق قىلىب، "سلام" جنجالى حل قىلىندى. بىراق، مېن اوچون بو قوتىلىش جدا آغىر و قىين كېچدى. چونكە مېن اۇقتووچى صفتىدە، صنفدە اۇقووچىلرېم نى دايم باشقەلرگە حرمت قىلىش، سلام بېرىش و ياردەم قىلىش كىي خصلتلرنى اۇرگە نىش و عملى قىلىشگە اوندەب، اۇرگە تىب كېلگن اېدىم. اېندى بۇلسە، اۇزىم باغكۇچە دەگى شىرىنتاى بالە جانلرنى "علىك" و نوازش و تشوىقلىمدن محروم قىلىب قۇيگن اېدىم. بو البتە مېنگە جدا الم قىلر اېدى!

ھە دۇستلر! لېكن بونگە قرەمەى، اۇشە ياقىمتاى بالە جانلرنىنگ شىرىن سلاملرېنى خدانىنگ باشقە بىرار يىخشى كۇرگن بندە سى باغكۇچە دە تاپىلىب، "علىك" آلر، دېگن اومىد بىلن اۇزىمگە اۇزىم تسلى بېرىب، وجدان عذابىنى آز بۇلسە ھەم يېنگىل قىلىب يورىبمن!

تاشكېنت- ھجرى ۱۳۸۴ /مىلادى 2005



قربان ليك!

- حاجى اكه، بو ييل قربانليكه نيمه سويه سيز؟

- بو ييل قۇي-مۇي آليشگه امكان بۇلمه دى.

- اونده نيمه قيلماقچى سيز؟

- پاده گه قۇشيله من!

- عيالىنگيز، بى بى حاجى-چى؟

- اونى هم پاده گه قۇشه من!!



وکالت دغدغە لری!

چقان بېك ایلگری یخشی درآمدلی اۋرینلرده ایشلب، قۇللیک-یاغلیگی طفیلی مادی نقطه نظرده اۋزینی انچه اۋنگلب آلگن اېدی. اۋز شهر و ولایتیدن تشقری، ایشلهگن باشقه شهرلرده هم اوی-جای، دکان، آپاراتمان و یبر ساتیب آلیب یا قورگن اېدی.

آدملر اونی، هم بایلیگی و هم منصبی اوچون دایم اعتبار بېریب یورر اېدیله. ایلگری عادی بېر آدم بۇلسه-ده، اېندی بۇلسه میده-کته نینگ آغزیده اونینگ آتی اېدی!

چقان بېك بېر نېچه بیلدن بېری ایشسیز یورگن چاغلریده، ملی شورانینگ سیلاو مسأله سی مطرح بۇلیب قالدی. شونده، اونینگ باشیده "وکیل" بۇلیش خیالی تاپیلیب، سیلاو ایشلریگه قتنه شیشگه عزم قیلدی. او، بو نیتینی بېرینچیدن یقین دۇستی و مصلحتچیسى بۇلگن اۋتکیربای گه آیتیب، اوندن مصلحت و نظر سۇره دی.

اۋتکیربای گه کېلسک، او چقان بېك نینگ ایشانچلی آدمی صفتیده اۋشه یوقاری منصبلر و درآمدلی اۋرینلرده ایشلب یورگن کېزلیده، اونینگ دستیارى و واسطه سی اېدی! شو باعث، چقان بېك نینگ "چیک و پوکى" قۇلى نینگ کفی دېك اونگه یخشی بېللی اېدی. او، چقان بېك نینگ نیتینی اېشیتیب جوده قوواندی و فکرینی تصدیق، هر قنداق یاردم بېریشگه تیار اېکنینی بیلدیردی.

چقان بېك انه شو دۇستى نىنگ يۇل-يۇرقلرى و فعاليتلرى طفىلى سىلاوده يوتىب، نهايت "وكيل" دېگن اولوغوار و فخرلى عنوانگه اېگه بۇلدى.

بىراق، "وكيل" بۇلىش اونگه ارزانگه توشمەدى. اۆتكىرباى نىنگ عادى و يوزهكى حساب-كتاب قىلىب بېرگنى گه كۆره، چقان بېك قىرب بىر-بىر يىرىم يوزمىنگ دالر نقد مبلغ خرچلېب، نهايت شو عجايب عنوان و اونىنگ جاذبهلى چوكى سىگه اېگه بۇلگن اېدى!

چقان بېك بىر-بىر يىرىم آى سىلاو جريانیده نې-نې مىده-كتە ضيافتلر، قنچه جېلك و تۇن، پۇستىن، سلّه، جاى نمازلر و نقد پولنى او-بو آدملرگه بېرمەدى، دېسىز!

بو كوره شده نقد پولدن تشقرى، جاى و ملكيدن هم بعضيلرىنى ساتيشگه مجبور بۇلدى. سىلاونى يوتىش اوچون، يىللر بۇيى ايگنه بىلن بىققن لرىنى، اېندى بۇلسه "پنج شاخ بىلن ساووريش" گه مجبور اېدى.

او، سىلاو اقيمى(جربانى)ده شونچه خرچلر آستىگه قالىب، بىر نېچه قتله يىرىم يۇلدن قىتىب، سىلاودن واز كېچماقچى هم بۇلدى. لېكن هرگل(دفعه) دۇستى اۆتكىزباى اونى تشويق قىلىب، كېله جكده يم-يشىل باغ-راغلرنى كۆرسە تىب، اونى عزميدن قىترگن اېدى.

بونى قرهنگ كه چقان بېك نىنگ آشىغى آلچى تورىب، ايشى اۇنگيدن كېلدى و قىلگن برچه خرچلرى و چېككن عذاب-تشويشلىرى اۋزى نىنگ چوچوك مېوهسىنى بېرىب، نهايت او سىلاونى يوتدى و "وكيل!" بۇلىب سىلندى.

او، اۆتكىرباى نىنگ مصلحت و مشوره لرى بىلن اۋز موفقىتىنى جوده كته بزم و ضيافت بىلن همه گه نان-آش بېرىب، نشانله دى. اۋشه كونى، اوزاق-يىقىندن كېلگن قوم-قرىنداشرلى، يار و دۇستلرى و باشقه لر اونىنگ يېلكه سىگه تۇنلر تشلب، بۇينىنى گل چمبرلر بىلن لىق تۇلدىلر!

اۋشە كوندن باشلې او، شېھر و قيشلاق آدملىرى تاماندىن چقان بېك اېمس، "وكيل صاحب!" دېب اتە لە باشلندى! بو عنوان اونگە جودە ياقىملى و لذتلى اېدى. هرگل "وكيل صاحب!" دېب خطاب بۇلگنئىدە، بىر قېت اېت(گوشت) آلر اېدى.

سىلاو موفقىتى نىنگ هيجانلى و قووانچلى دملرى اۋتېب، هيجان و شادلىك حرارتى انچە پسه يدى. وكيل چقان بېك مركزگە جۇنەدى و او بېردە كتە بىر حويلىنى آلب، پارلمان ايشلرېگە قتنشە باشلەدى. چىرايلى و قىمت بەھا موتر، هيداوچى و قوراللى بىر ساقچى(قۇرىقچى، بادىگار(د)، بىر نېچە خذمتچى و بكاوول داېم خذمتىدە اېدى. بىر و كۇككە فخر ساتىب، اۋتە آغىرلىك و صلابت بىلن يورردى!

اوبدە وكيل صاحب نىنگ دسترخانى آچىق و كىم كە حكومتگە بىرار ايشى و مشكلى بۇلسە، البته كە اۋز و كىلى بۇلمىش چقان بېككە مراجعت قىلىب، اوندىن ياردم سۇرردى. كۇپلرى اېسە، كېچە-يو كوندوز ايشلرى بَجْرىلگونچە اۋز و كىللىرى نىنگ قۇشخانه سىدە ياتىب آلر اېدىلر!

وكيل چقان بېك بىر كېچە آدملىرىنىڭ كېلىم-كېتىمى و اولرگە كېتە دىگن خرجلرنى اۋىلب، اينىقسە سىلاوگە قىلگن مصرفلرېنى هم اېسلە گنئىدە باشىدىن توتون چىقىب، قۇرقوۋگە توشدى. شوندىن وفادار دستىارى اۋتكىرباى نى يانىگە چارلب، اونگە:

- اۋتكىرباى دۇستېم! منە، سىلاونى يوتىب، وكيل هم بۇلدىم. شونچە كتە مبلغ هم قۇلىمدن كېتىب، اوستىگە-اوستگ كېچە-يو كوندوز بو مھمانلرنىڭ خرجى هم ورسره! اېندى بو وكىللىك مېنگە نىمە بېرەدى؟ فقط شو قوروق اتى و دېدبە سىدىن باشقە هېچ نرسە يۇق-كو! يكە مردمگە بېرگن تۇنلرېم نى سنەسك، بىر مىنگتە دن آشەدى! باشقەلرېنى اوباققە قۇيە بېر، دېدى قىغولى آھنگدە.

شوندا ئۆتكىرباى دېدى:

- اى دۇستىم، غم يېمىنگ! مېنىنگ حساب-كتاب و تخمىنلرېم گە كۆرە، سىز و كالت جريانېدە كىمىدە شو خىرلرېنغىزىنىنگ بېش بىر بىرىنى تاپەسىز!
و كىل بۇلەن، دېب يۇگورىب يورگنلر، شونچە خىرلر قىلىب، اۋزلىرىنى "اۋتگە-
سووگە اورىب"، و كىل بۇلىشگە اىنتىلگنلرى شونچە كە مردمگە خىزمىت قىلىش يا
هوس مى اېدى؟

يۇق! اولر بو "و كالت"نى اېنگىل يىخشى و كۆپ سوت بېرەدىگن اېنك(سىگىر)دېك
بىلىب، بو يۇلگە شونچە سرمايه تىككىنلر! بۇلمسە هېچكىم پولىنى اۋز قۇلى بىلن
شونداققىنە كۆككە ساوورەدىگن اخماق اېمس و باشى هم شىشمەگن!!
- اۋتكىرباى، قىزىسىز-! بونچە پولىنى بو قوروق ات بىلن قىنداقتاپىشىم خىداگە
بېللى!

- و كىل صاحب، سىز كۆپ هم قىغورمىنگ. اۋزىنغىزنى قىينەمىنگ و تشوئىش هم
قىلمىنگ!

- تشوئىش قىلمەى هم بۇلەدى مى؟! اىشانىنگ، بعضاً اۋىلب، خىتا كېچەلرى
اوخالامەى چىقەن!

- مەنە، مېنى ايتدى دېيسىز! سىز اۋز-اۋزىدىن هم خىر قىلگن پولىرىنغىز و هم
بېرگن ساوغەلرېنغىزنى نېچە برابر قىلىب آلەسىز!

- قىنداقتا اېكەن!

- شاشمىنگ، مەنە يىخىلىب اېشىتىنگ! مېن عادى و شونداققىنە يوزەكى بىر
حساب قىلىب بېرەن!

- خۇووش، قىنى اېشىتەيلىك-چى؟!

- سىزگە ايتىم بىرىنچىدىن، و كىل بۇلگنلرگە دولت درآو اۋن مىنگ دالر موتر و
او-بو نرسەلر اوچون بېردى!

ايكىنچىدىن، ھەر آيدە اۋرتە چە حسابگە كۈرە آيلىك و بخشيشلر ھەمەسى بۇلىپ
ايكى مىنگ دالر، بلكە كۇپراققە يېتەدى. اگر شونداق عادىگىنە حسابلەسك،
بېش يىل و كالت دورەنگىزدە بونىنگ اۋزى آزى بىلن (۱۲۰) مىنگ دالر بۇلەدى!
منە، دولتىن آلگىنىگىزىنىنگ اۋزى نقد (۱۳۰) مىنگ دالر چۈنتەگىزدە!!

قرەنگ، حتا سىز جلسەلرگە بارەسىز مى، بارمەسىز مى؛ بحثلرگە قۇشيلەسىز مى
يا يۇق مى، خالص كلام ھرحالدا شونچە نقد پول سىزنىكى!!
بولردن تشقرى، اگر سىز وكىللر بىرآز حكومت بىلن تالاشىب، او-بو خرچلرنى
كتە راق و كۇپراق قىلىپ كۇرستىنىگىز، آيلىك و باشقە درآمدلرېنگىز ينە ھەم
كۇپەيىشى مەمكن!

- خۇب، باشقەسى-چى؟!

- منە، اېندى سىز وكىل سىز. مركزگە و آينىقسە اۋز شېھر و ولايتىنگىزگە
بارسىنگىز، ھىچ بىر دعوت و ضيافت و ھىچ بىر تۇى و بىرەم سىزسىز اۋتمەيدى.
اولوس، اۋز وكىلىنى آيتمىسدىن علاجى يۇق.

- تۇيلر و ضيافتلرگە ھەم خبر بۇلدىك و باردىك دېلىك. اوندن نرىسى-چى؟!
- اوندن نرىسى شو كە، بو مراسملردە باشقە اولوغوارلر قطارى اولوس اۋز
وكىلى نىنگ يېلكەسىگە ھەم بىر تۇن يا جېلك تشلەمسدىن علاجى يۇق! مبادا
اولرنىنگ فكريدە بۇلمسە، مېن اولرنى متوجە قىلەمن!!

منە، اېندى بىرگىنە مېدە و قىسقە حساب قىلسك، سىز بېش يىل و كالت
دورەنگىزدە كەمىدە ايگى مىنگتە تۇن و جېلىك كىيەسىز!

اېندى، سىزنى كۇرماقچى بۇلىپ يا كە ايشى توشىب كېلە دىگنلرنىنگ قۇى
كېلتىرگنى كىم، قاپ-قاپ گوروج(برنج) و صندوق-صندوق مېو-چېو
كېلتىرگنى كىم، خالص باشقە ساوغە-سالاملرنى ھەم حسابلې چىقسك، حسابىنى
آلامەيسز!

- خۇب، بارىنگ كە شولرىنىڭ برچە سى بۇلىب، شونچە خرچلىرىمنى ھم قاپلە دى دېنگ. اېندى، بوياغى فقط "وكيل صاحب!" دېگن دېدبە لى قوروق عنوان بيزگە قالر اېكن-دە!؟

- يۇق، شاشمەى تورىنگ. بو حسابلر حالى ھمەسى اېمس!
- قنداق!؟

- منە قۇلىنگىزدە دېپلماتىك پاسپورت. سىز سفرلرگە كېتەسىز. ھر ايش فصلىدە كىمدە بىر قتلە ھم تشقرى سفردە بۇلسىڭىز، "جيب خرج" و سفرىە نڭىزىنىڭ اۈزى كۇپ پوللر بۇلەدى و سىل و تماشالرىنىڭىز ھم تېكىن!
چقان بېك، اۈتكىرباى نىنگ ھر بىر حساب-كتايىنى اېشىتىب، آغزى تابارە ايلجە يىب، شلپىنگ بۇلىب ايكى چېكە سىدە اسىلىب تورگن قولاغلىرگە قىرىب يېتەى، دېب قالدى!

او، اۈلتىرگن اۈرنىدە بىر قۇزغەلىب، اۈزىنى اۈنگلەب، گۈدەسىنى اۈتكىرباى گە بىرآز يقىنراق قىلىب:

- اېى اۈتكىرباى، چىندن ھم ذھنىڭىز آتىنىڭىزگە ماس اېكن-دە! انه بو نرسەلرنى اصلا اۈيلەمەگن اېكنمن. خۇب، انه شونداق باشقە ياقىملى و ياغلىق نرسەلرنى ىنە ھم اۈتىنگ-چى!؟ دېدى ذوقلە نىب.

- باشقە سى شو كە، اگر مېنىڭ سۈزىمنى اېشىتىب، مصلحتلرىم گە قولاق سالىب، توزگن رىجەلرىمگە عمل قىلسىڭىز، كۇپ نرسە گە اېرىشەسىز.
- قنداق قىلىب؟

- منە، دعوا و مشكللرى بۇلگن يا كە حكومتگە ايشى توشگن، اۈنىقسە كتە چوكى و يوقارى منصبلر اشتياقىدە كويىب يورگن آدملىرىنىڭ اۈزى بىز اوچون كتە درآمد بولاغى!!

- بونىسى اېندى قنداق؟

- بونیسی نی خودی اؤشه درآمدلی چوکیلرده ایشلب یورگن پیتلرینگیزدېک،
مېنگه قۇیبب بېرېنگ!
- یخشی، شونداق بۇلسین!
- ویکیللر اؤز ولایتلری نینگ کته عملدارلری و درآمدلی چوکیلرېگه کیشیلرنی
مقرر بۇلېشېده کته نقشلری بار. کته خرچلر قیلیب، فلان ریاست و یا کته
اؤرینلرگه مقرر بۇله یین، دېب یورگنلر نینگ سان-سناغی یۇق
وکیل چقان بېک، دۇستی اؤتکیربای نینگ بو عجایب و قووانچلی حساب-
کتابلری و درآمد بولاقلرینى اېشیتیب، هم حیرتگه توشدی و هم یوره گیده
قندهی دیر قووانچدن تۇله بیر ایلیق تینچلیک و خاطر جمعلیکنی سېزدی.
او، اېندی شونچه قیلگن خرچلری بېهوده کېتمه گنی و وکالت اؤرنی قتچهلر
یاقیملی و ثمره لی اېکنلیگی گه ایشانچ حاصل قیلیب، کېله جک رېجه لرنی
اؤتکیربای گه تاپشیریشنی نیت قیلدی و او بیلن خیرله شیب، یاتاگیگه باریب، بو
کېچه سی تینچگیگه اوخله دی!
(کابل- قوس آیى ۱۳۸۵)



خرگوش!

دۇستلرئيمز دن بئرى ۱۳۸۴ -ئىلى پارلمان سىلاولرىده قتنه شىب، اۇزىنى ولايت شوراسىگه كاندىد قىلگن اېدى. بونى قره نك كه، قرعه تشلنگنده او كىشى نىنگ كاندىد نشانى خرگوش(قويان) چىقىب قالئىدى!

بو موضوعه خوش ذوق و هزال دۇستلرئىدن بئرى قىزىقىب، قوئىده گى عجايب مصرعلرنى مطايبه طرزده ائىتگن اېكن:

كېچه كۇرىب سىز بئر توش باشده بار مو عقل و هۇش!
اۇزىز اوســـــــتادِ دانا كاندىد نشانىز خرگوش!

شوخ طبع و هزال شاعر اورتاقلرئيمز دن بئرى، كاندىد قىلگن دۇستئيمز نىنگ خوش بئچىم، كته راق گوده سى همده كېلىشگن قد و قامتىنى نظرده توتىب، ائىكئىچى بئت نىنگ مصرعلرئىنى قوئىده گىچه ائىتئىدى:

”بو قد و قامتىزگه سىزگه چىقىئىدى خرگوش!“



«قافيه» نى قول دن بىر مىنگ!

عروض وزنلىرى و ژانرلىرىدە يازىلە دىگن شعرلردە كۆپ مەھم و نازك صنعتلرگە رعايە قىلىش ضرور بۇلىپ، اولر نىنگ ھربىرىنى نظردە توتىمىدىن علاجى يۇق. جملە دن "قافيه" كلاسىك شعرلر نىنگ دىپىرلى برچە ژانرلىرىدە مە اورىن توتەدى. شو باعدىن بۇلسە كېرەك، تذكەرلردە شاعرلر نىنگ قابلىتى و مھارتى حقىدە سۆز يورىتىلگندە، "قافيه" دە قنچە لر ماهر و قابل اپكنلىكلرى حقىدە ھم علىحده اعتبار بىرىلەدى.

غياث ھىروي ناملى بىر شاعر نىنگ قىزىق عادتى بار اېمىش. يعنى ھرقنچە يىخشى-يىمان قافىەنى اوچرەتسە، درآو شعرگە كىرگىزىر اپكن. شوباعث، دۇستلىرى اونگە "قافيه" لقب بېرىپ، "غياث قافيه" دىپىر اپكنلر!

شاعرلر ارە سىدە، اۆزگە لردن گقافيه" اىزلب قرض آلىش، حتى "قافيه" اۇغرىلرى تۇغرى سىدە ھم تذكەرلردە خبر بېرىلگنى حقىدە نىمە دېسىز؟!

اۆتمىشلردە "قافيه" گە اشدى عشقى توشگن بىر شاعر بار اپكن. او چىرايلى "قافيه" لرنىنگ شوقدر مفتونى اپكن كە، اولرنى قندەى بۇلمەسىن، البتە قۇلگە كىرىتراپكن، حتى شول بىلن بۇلسە ھم! قرەنگ كە دۇستلىرى اونىنگ بو عادتى(كسلىلىگى)نى بىلىپ، قچان كە پول كېرەك بۇلىپ قالسە، چىرايلى قافىە لرنى تاپىپ، عوضىگە اوندىن پول اوندىرر اپكنلر! يا كە ضىافت اىستگى بۇلسە، "قافيه" لرنى ضىافت عوضىگە اونگە تاپشىرر اپكنلر!

قرەنگ كە شاعرلر "قافيه" دستىدن نى-نى كۇپلرگە توشمس و نى-نى ايشلرنى قىلىشىگە مجبور بۇلمس اپكنلر. لېكن بوكونگە كېلىپ "آق شعر" و

اونىنگ تورلىرى، شاعرلىرى عروش و قافىه "تضيقاتى" دن آزاد قىلدى و اىنىقسە يىنگى شاعرچەلر اېسە، بۇلمە غور قافىه سىز شعرلىرى بىلن اۋزلىرىنى بو گردابلردن بوتونلەى قوتقرديلر!

بىراق "قافىه" حقىدە مېن سىزلىرگە حكاىه قىلماقچى بۇلىب تورگن واقعه يوقارىدە گىلر نىنگ بىرارتە سىگە سىرە (هېچ) هم اۋخشە مەدى. مېنگە ايشانىنگ، "قافىه" طفىلى هېچ بىر شاعر بوتون ادبيات تارىخىدە شوندىكى كۈيگە توشمەگن، دېسەم اصلا مبالغە بۇلمەدى! منە اۋقىنگ، بلکہ سۈزىمگە ايشانرسىز:

مىرزا اكه "زۈرمە-زۈرەكى" شاعر بۇلسە هم، لېكن شعر و شاعرلىك نىنگ اشدى مخلصى و علاقەندى دىر. يعنى او كىشى نىنگ شعر يازىشدا اونچەلىك استعدادلىرى بۇلمسە هم، لېكن شاعر بۇلىش و شعر ايتىشگە اشتياقلىرى جدا يوكسك و كوچلى! تۇغرى انه شو اشتياق كوچى، اولرنى شعريت نىنگ پسكۈچەلرى و چقمە-چوقور بۇللىرىگە سودرەب اىب يورىدى! نىمە بۇلسە هم، يورە كلرىدە گى تىنگرى سالگن ازگىنە شعر اوچقونى، "خرمنى كويدىرىشده، اوچقون هم بىترلى" دېگنلىرىدېك، او كىشى نىنگ يورە كلرىدە گى اۋشە اوچقونده كېچە-يو كوندوز كويىب، پىشىب ياتگنلر!

مىرزا اكه مىز كېچەنى كېچە دېمەى، كوندوزنى كوندوز دېمەى، سفر و حضرده، حتى كه اويقولرىدە هم شعر ايتىب چىقر اېكنلر!

او كىشى، بعضى اۋتمىش شاعرلىرىنگ تۈلىق ترجمە حاللىرى يازىب قالدىرىلگن بۇلمسە هم، ماهر تدقيقاتچىلر اولرنىنگ شعرلىرىدن تىتكىلىب، اولر حقىدە كۇپ معلوماتلر كشف اېتگنلر، دېگن گېنى كىمدن دىر اېشىنگن يا كه قە يېردە دىر اۋقىگن اېكنلر. شو باعث، ادبيات تدقيقاتچىلىرى اواره و سرسان بۇلمە سىنلر، دېب او كىشى اۋلىملىرىدن االدىن، اۋزلىرى حقىدە بيوگرافىك بىر شعر يازىب، كېلەجك نسللرگە مېراث قىلىب قالدىرىشگە قرار قىلىدىلر!

ميرزا اكه انه شو عجايب نيتنى عملگه آشيرش اوچون شعرنينگ مطالعى نى يازيشگه باشلبديلر. معلوم كه، شعرده مطلع جدا مهم بۇلىب، كېينگى بيتلرگه يېتكچىلىك قىلهدى. شو باعث، مطلع جدا مضمونلى و هر نقطه نظرده پخته و چىرايلى بۇلىشى كېرەك. قىسقه سى شو كه، ميرزا اكه ميز مطلع نى قويده گيجه باشلبديلر:

"اصل آتيم ميرزا اكه، نواسه بابا يۇلداش من"

نيمه بۇلىدى- يو مطلع نينگ ايكيىنچى مصرع سىنى ايتماقچى بۇلگنده، الهام پرى سى قاچىب، "قافيه" هم يۇقالىب كېتىدى! شونده سى بۇلىب، مطلع توگه تيلمە سى قالىدى. او كىشى اېسه اۋشه كون، تونى بىلن قنچه لر اورينسه لر هم، بىراق الهام پرىسى كېلمە سى، قافيه هم بند بۇلگىنچە قاله بېرىدى و "يۇلداش" سۇزىگه مناسب قافيه تاپىلمىدى!

اېرته سى ينه "قافيه" اۋىلىش بىلن كېچ بۇلىدى و تون نينگ جيم- جىرىتلىگى هم اولرگه ياردن بېرالمە سى، "قافيه" معماسى يېچىلمە سى، ميرزا اكه نينگ تىنچى بوزىلگىنچە قاله بېرىدى!

خلص، او كىشى نينگ ايتىلىشلىرى بىر هفته دوام اېتىدى. اوشبو مدتده، ميرزا اكه معمانى يېچىش اوچون "يۇلداش" گه قافيه داش بۇلىشى ممكن بۇلگن ماش، تاش، قاش، لاش، پاش، ... سىنگرى اۋنلب سۇزنى كاغذ يوزىگه قطار قىلىب يازىب قۇيىبديلر. لېكن اولر نينگ هېچ بىرىنى مطلع نينگ بىرىنچى مصرع سىگه ياپىشه دىگن ايكيىنچى مصرعگه اۋرنه تيش امكانى بۇلمىدى. قافيه ياپىشسه مضمون تۇغرى كېلمس، اگر مضمون تۇغرى بۇلسه قافيه ماس توشمس اېمىش! ميرزا اكه نينگ شعر بولاغى توبدن قورىب قالىب، اۋزلىرى اېسه سحر بۇلگندېك، گۇيا!!

نهايت ناچار احوالده قالگن ميرزا اكه، "قافيه" نينگ تنگ گردا بىدن

قىشلاغىمىزدىن كانىد!

دېوانە قۇل آتىگە ماس ذاتى ھەم تېلبە راق آدم اېدى. شوندى ھى ھەم بۇلسە، او جودە ادعالى و من-منلىككە بېرىلگن آدم اېدى. بونى قرەنگ كە پارلمان سيلاولرى مسالەسى مطرح بۇلگندە، او ھەم اۋزىنى كانىد قىلىدى!

آدملر اونىنگ بو ايشىدن حىرتلەنىپ، بىرتە-ايكىتەلر اوندن:
- اوو دېوانە قۇل، سىز نىمە اوچون اۋزىنگىزنى پارلمانگە كانىد قىلدىنگىز؟ دېب سۇرەبدىلر.
دېوانە قۇل اېسە:

- اې اې، ھەمە جايدن كانىدىلر بار اېدى، بىزىنىنگ قىشلاغىمىزدن كىشى كانىد قىلمەگن اېدى. شو اوچون، قىشلاغىمىز قطاردن قوروق قالمەسىن، دېب اۋزىمنى كانىد قىلدىم-دە، دېبە جواب بېرىگن اېكن!!



تاكسى ماجراسى

اويىم بيلن ايشخانەم ارەسى چمەسى ۷-۶ كىلومىتر. افسوس كە بو يۇلدە شەر سرويسلرى قتنشمەى، اۋن رويپه(افغانى)لىك تاكسىلر بارىب كېلەدى. بو يۇنەلېش نىنگ سۇنگى بېكتى شەر كسلخانەلرېدن بىرى بۇلگنلىگى باعث هم تاكسىلر دايم قتنب تورەدى.

مېنىنگ ايشخانە م سۇنگى بېكت(ايستگاه)دن بېرى راقده و تاكسىدە بارىش-كېلىش مېن اوچون جودە قولە دىر. بىر كونى معمولگه كۇره ايشگه بارىش اوچون نوبتدە تورگن تاكسىلردن بىرنىنگ آلدىنگى اۋرىندىغىگه اۋلتىردىم.

مېن تاكسى نىنگ بىرىنچى و يگانە يۇلاوچىسى اېدىم. شو پىتدە بىر بىگىت، ۷۵-۸۰ ياشلى چال نىنگ قۇلتىغىدن اوشلب تاكسى گه آلېب كېلدى. اولر بيلن اۋرتە ياشلى بىر عيال هم بار اېدى. چال قىرئىلىك و كسللىگى باعث، بىگىت ياردمى بيلن زۇرغە و سېكىن هينقىللب، نالش قىلىب ارقه گه اۋلتىردى. يانيدە عيال و اونىنگ يانيدە اېسە بىگىت اۋلتىردى.

كۇپ اۋتمەى چارشانە و قارنى كتە سېمىز بىر كىشى كېلىب

آلدىنگى اۋرىندە مېنىڭ يانىمدە زۇرغە اور-تيقى قىلىپ اۋلتىردى.
اونىڭ گودەسى شوقدر كتە اېدى كە، مېنى خسدېك قىلىپ ھىداوچى
تامان سوريب، اۋزى آلدىنگى چوكىنى بوتونلەى اېگللەدى. مېن اېسە
ايكى چوكى ارەسى و مۇترىنىڭ گېرى و آھن بىرىكى اوستىگە
تۇغرى كېلىپ قالدىم!

مېن ناتىنچ بۇلىپ، ھىداوچى گە:

اېندى ھىدەنگ، كېتەيلىك! دېدىم!

صبر قىلىنڭ، ارقەگە يەنە بىر كىشى كېلسىن!

ارقەدە اوچ كىشى بۇلدى-كو!

يۇق، او بېردە تۇرت كىشى اۋلتىرەدى!

مېن اۋلتىرگن جاي جودە ناقولەى و ناتىنچ اېدى. اياغىم
چوممىش بۇلىپ، يىغىلىپ قالگن اېدى. شوندا ھىداوچى بو حالىمنى
كۇرىپ، يورەگى كويدى شېكىللى، سۇل(چپ) اياغىمنى قۇلى بىلن
گېرنىڭ اوستىدن زۇرغە كۈتەرىپ، اۋزى تامان اۋتكزدى! بو بىلن،
مېنىڭ بىر اياغىم حالىگى سېمىز آدم تامان و ايگىنچىسى اېسە
ھىداوچى تاماندا تورىپ، گېر و آھن بىرىك دستە لرى اياقلىرىم
اۋرتەسىدە ايكى قازىقدېك، تىك تورگن اېدى!

شوپىتدە خىرىت كە تۇرتىنچى آدم ھم تاپىلدى. تصادفگە كۈرە
او ھم گودەلى و سېمىز آدم اېدى. او، چال و ھمراھلىرىنىڭ آھ و
وايلىرىگە قرەمەسى، زۇرغە اولرنى سوريپ، يانلىرىگە اۋزىنى تىقىپ

جايلاشتىردى و گودهسى نىنگ بار اغىرليگىنى يانيدى گى يىگىتگە تشلب، بىرنىچە قتله تاكسى نىنگ اېشىگى نى قتيق اورىب، ياپماقچى بۇلدى. بىراق هرگل اونىنگ گودهسى و كىملىرى اېشىككە مانع بۇلر اېدى. يىگىت نىنگ ياردىمى هم فايده قىلمە دى. شوندىدە هيداوچى توشىب بارىب، حالىگى چرچب هر سىللب اۇلتىرگن سېمىز آدمگە: قنفاق آدم سىز، بىر اېشىكىنى هم ياپالمەى سىز! دېدى. كېين او گوده لى آدمگە: اۇزىنگىزنى يىخسى اىچكرىگە آلنىنگ، دېب اېشىكىنى ضرب بىلن شونفاق هم قتيق ياپدى كە، تاكسى خودى بىر چوقورلىكدن لوچىب اۇنگندېك، برچە مىز بىر-بىرىمىزگە تېگىب كېتىك! شوندىدە حالىگى كسل چال نىنگ آخ و واى نالش و اعتراضى چىقدى.

هيداوچى خودى هېچ نرسە بۇلمە گندېك چال نىنگ اعتراضلى نالشلىرىگە قرە مەى، اۇزىنگە كېلىب اۇلتىردى. او كلىدىنى جايى گە تىقىب بورەدى. مۇترنىنگ ماشىنى "غر-غر" قىلىب اۇچدى. هيداوچى يىنە كلىدىنى بورەب، ماشىنىنى سلف اوردى. بو گل ماشىن چالان بۇلىب، بىراق تاووشى توماو (زكام) گە چلىنگن كسل آدم يۇتلىگىدېك، اوزىلىب-اوزىلىب چىقر اېدى. هيداوچى اېسە اكسىلىترنى تېز-تېز باسىب، مۇترنى رىز بېرر اېدى. شوندىدە ماشىن نىنگ تاووشى اوزىلىب-اوزىلىب "تر-تر" قىلىب چىقدى و تاكسى هم خودى سوو يوزىدە گى مىدە قايقچە نى سوو تۇلقونلىرى قىمىرلتگىنى كىبى سىلكىنىب تورر

اېدى.

شسو پيئەندە كوتىلمە گندە "تَرَقَّ" اېتىب، كوچلى بىر پارتلىشگە
اۋخىشش تاووش چىقىپ، تاكسىنى لىزەگە تىشلەدى. مېن و يانىمدەگى
كتە قارىن آدم، يىنە اتخارى پارتلىش بۇلدى شېكىللى، دېب بې اختيار
گودە لىمىزنى ايلگرى بوكىب، باشىمىزنى قوبى گە اېگدىك! ارقة دن
حالىگى چال، عىال و باشقە لىزىنگ ھە ارەلش-قورەلش تشویش و
اضطرابلى تاووشلىرى اېشىتىلدى. چال اېسە نالش و قلتىراق سېس
بىلن:

توبە، بو شۇخ بالە لىزىنگ پىتاقىلرى قۇلدىن شو بېردە ھەم تىنچ
اېمس كىشى، دېب اولرنى قرەى باشلەدى. (چال نىنگ قولاغى بىراز
اغىرلىگى باعث، چىققن تاووشنى يىخشى اېشىتمەگن اېكن)
شوندە ھىداوچى كولىب:

چۇچىمىنگلر، قۇرمىنگلر! بو نې پارتلىش اېدى، نې پىتاقى-مىتاقى.
مۇتىرىم "تېل بند" قىلدى، دېدى! كېىن، تانك تېللىرنى "غوت-غوت"
قىلىب سۇكىب:

بو شىدرلعتلر و... لىر خراب تېللىرنى ساتىب، بىرچە مۇتىرلرنى
ايشدن چىقە رە دىلر. بىرتە سۇرە يىدىگن آدم نىنگ اۋزى يۇق! دېب
قۇشىمچە قىلدى.

مېن بۇلسە:

اېندى بۇلگن ايش بۇلدى، جۇنەنگ، بىزگە كېچ بۇلدى، دېدىم.

ھىداوچى مۇترىنى يەنە بىر نېچە قتيق-قتيق رىز بېرىپ، ماشىن نىنگ تاووشى بىراز عادى بۇلگندە، اۋنگ(راست) قۇلى بىلن گېرنى اوشلش اوچون اياقلىرىم نىنگ اوياق-بوياغىنى پشەلەدى. مېن اېسە بىراز جىركە نىب، اونىنگ قۇلىنى اياقلىرىم ارەسىدە گى گېر اوستىگە قۇيدىم!

ھىداوچى گېرنى اوشلب بىر-ايكى حرىك بېرىپ، اونى اۋزگرتىرماقچى بۇلدى. بىراق، گېر اۋز اۋرنىدن اصلا حرىك قىلمەدى. ھىداوچى بو گل گېرگە باقىپ، بار كوچى بىلن اونى سوريب ايكىنچى سىگە تشلەماقچى بۇلدى. لېكن گېر قنچە قر-قور قىلسە ھم اۋرنىدن قىمىرلەمەي، باشقە سىگە توشىش امكانى بۇلمەدى.

شوندە ھىداوچى اچىق بىلن، تىلىنى بىراز آغزى نىنگ بىر چېتىدن چىقە رىب، تىشى بىلن تىشلە گن حالدە ايكلە قۇلى بىلن گېرگە تىرمە شىب، اونىنگ قر-قورنى چىقردى و زۇرغە ايكىنچى سىگە توشىردى. شوندە تاكسىچى مېنگە باقىپ، دېدى:

بو گېر مۇترىنىنگ اۋزى نىكى اېمس. شو اوچون تېز بېرىگە حرىك قىلمەيدى!

نېگە اېندى؟!

سىزگە ایتسم، بو مۇترىم "ھفت پدرە!" بادى سى "والگا" نىكى؛ ماشىنى اېسە "تويوتا"; پمپر و گلگىرى "اوپل" و "...! لېكن، سىز بونىنگ "بادى سىگە قرەمىنگ، كشى گە قرەنگ!" بلکہ سىز يخشىراق بىلرسىز،

ذاتاً "پيوندلىك" و "دورگه" نرسه لر جوده يخشى و كوچلى بۇلەدى. منه خچيرنى آلە يلىك. بو جانور آت بيلن اېشك نينگ قاووشيشيدن توغيلهدى. بيراق ايگله سيدن هم كوچلى و چيدملى دير! يا كه "پيوند" قيلينگن مېوهلى درختلرنى كۆرينگ. بولر نينگ مېوهسى جوده مزەلى و حاصللى هم مۇل-سۇل!

اېندى مېنينگ بو جانور "هفت پدرة" مۇتريم هم شونداق. بو جانور انه شو توريشيده ۲۰-۱۵ ييلدن بېرى تينمەلى خدمت قيلهدى و مېن بيلن عايله م نى باقيب كېلهدى! كته اوغليم شو جانور بيلن همياش! بيلمە ديم بونى آلديم، او توغيلدى مى يا كه او توغيلدى بو جانورنى ساتيب آلديم مى! انيق بيلمەلى من، لېكن خاتينيم گه انيق معلوم!

مېن اېسه ايلجه ييب، باشقه لر بيلن جيمگينه هيداوچى نينگ قيزيق سۇزلرني اېشيتيب، او كۆپ اېزمەلىك قيلمەلى، بيزنى تېزراق مقصديميز گه يېتكوزسين، دېب ايندمەلى اولتيرديم.

بيزاز يۇل باسيب، باشقه مۇترلر بيلن بيزنينگ تاكسى هم تۇختب قالدى. ينه نيمە بۇلدى؟ دېب سه لگنده، هيداوچى:

منه كۆرمەلى سيزلر مى، يۇل بېرك(بند)، دېدى!

چيندن هم بيز چارراهه نينگ يقينى گه كېلىب تورگن اېكن ميز. قرە سك، تۇرت ياقدن اۇنلب مۇتر نوبتسيز كېلىب، بير-بيرلريگه شونداق هم قۇشيليب-چتيليب كېتگن اېكن كه، اوست-باشلريگه

مۇترلر نىنگ توتونى، چىنگ و توپراغى اۇلتىرگىن بىر نېچە كۇرىمىسىز ترافىك ھىم مۇترلر نىنگ بو عجاب تۇقىمە سىنى اچىشگە قۇرلىرى بېتمەى تورگىن اېدى.

اخىر، بىزىنىگ پايتختىمىز بوتون دنيا پايتختلىرى ارەسىدە عجاب خصوصىتى بىلن يگانە و ممتاز-دە.

نىمە دېسىز مى؟

يعنى كابل شەھرى، چارراھە لرىدە ترافىك چراغلىرى بۇلمە گىن دنىادە گى يگانە پايتخت دىر. ھېچ بۇلمە گندە شو نرسە اوچون ھىم دنىادە بىرىنچىلىك و يگانە لىكنى قۇلگە كىرىتگىنىمىزدن قووانىب، فخرلىنىك ارزىدى!

قىسقىسى، ھىداوچىلر چىدمىسىزلىك بىلن كېتمە-كېت بلند ھارن قىلىب، ھركىم اۇز الدىدە گى مۇترلرنى اىما-اشارە، چراغ، ھارنلر و حتى قۇللىرى بىلن حركت قىلىشگە اوندر اېدىلر. بو ھارنلر و تورلى سېسىلر، گدايلر و مۇترلرنى اوياق-بوياغىدن اۇتىب يا اونى تازەلب يورگى مىدە بالەلرنىنگ پول طمع سىدە چىقەرەدىگىن تورلى آھنگدە گى تاووشلىرى و "قىي-چوو"لرى ھىمە سى قۇشىلىب، خودى نورۇز يا كە بىرە م كونلرىدە گى بالەلر تۇپلنگىن سىلگەھنى اېسلەتر اېدى!

باشىنگىزنى آغرىتمەى، او حالدە ھېچكىم نىنگ بىر قىرىچ ھىم ارقە يا اىلگىرى كېتىشگە امكانى يۇق اېدى. شونندە برچە مۇترلرنىنگ ماشىنى رېز بېرىلگندە، فضا توتوندن تۇلىب، مۇتردە گىلر شىشە لرىنى

كۈتە ريشگە مجبور بۇلدېلر. بيز ھم بو ايشگە مجبور بۇلدېك. لېكن
حاليگى كسل چال اۋلتيرگن تامانده گى شيشه نېگە دير كۈتە ريلمەدى.
چال توتوننى تنفس قىلىپ، كېت مە-كېت "توخ-توخ" قىلىپ، نەش
ايشى قىيىنلشدى. شونده، او مىنگىللب هيداوچىدن شيشەنى كۈتە ريب
بېرىشنى التماس قىلدى. هيداوچى اېسە اونگە بير پيچتابنى اۋزە تيب:
آتە، بير قۇلنىگىز بيلن شيشەنى يوقارى كۈتە ريب توريب،
ارەلىغى گە بو پيچتابنى تيقسنىگىز، شيشە تورەدى، دېدى!

بېچارە چال قلتيراق قۇلى بيلن شيشەنى كۈتە رالمەدى. اونگە
يانىدە گى عيال ياردەم بېردى، بيراق چال اۋشندە ھم پيچتابنى
هيداوچى ايتگن تېشىككە كىرىتەلمەدى!

شونده هيداوچى كىنايى اھنگدە:

اې آتە جان، تيار تېشىككە بير نرسەنى تبقالمە سنگىز مېن نيمە
دېدى!! دېب پيچتابنى چالدىن اليب، اۋزى تېشىككە تىقىپ شيشەنى
كۈتە ريب قۇيدى.

چالگە هيداوچى نىنگ كىنايەلى سۈزى جودە اغير باتدى. شونده
او چيدالمەدى:

اوكە م، بيزلر ھم ياشلىگىمىزدە تاغنى تالقان قىلە دىگن بىگىت
اېدىك. سېنى ھم تېنگرى بيزلر نىنگ ياشىمىزگە يېتكىزىن، اۋشندە
ياشلىك و قىرلىك نىنگ نيمە ليگىنى بىلىپ آلەسن، دېدى توخ-توخلب!
شو پىتدە شكر كە يۈل اچىلدى. بيز اېسە اۋز يۈلۈمىزنى دوام

اېتتيرديک. ايشخانه م گه چمه سى ايکى-اوچ يوز متر قالگنده، يانيمده گى حالىگى سېمىز کته قارن آدم توشماقچى بۇلىب، هيداوچىدن تاکسى نى تۇخته تيشنى ايسته دى. هيداوچى تاکسىنى يۇل نىنگ بير چېتىده تاختتىدى و يانيمده گى سېمىز آدم اېشىكىنى آچىب توشماقچى بۇلدى. بيراق اونىنگ بير-ايگى اورينيشى فايده سىز بۇلىب، اېشىک آچىلمه دى.

هيداوچى اونگه:

اېشىک نىنگ دسته سىنى اۇز تاماننىگىز گه تارتىب توريب، تنه نىگىز بىلن اېشىککە زۇر بېرىنگ! دېدى.

سېمىز آدم هيداوچى نىنگ ايتگنيدېک قىلدى. بيراق نتيجه سىز بۇلدى. او حتى کته و يۇغان گوده سىنى مېن تامان آلىب، بار کوچى بىلن اۇزىنى اېشىککە اوردى. شونده اگر هۇکىز بۇلگنده هم بونداق ضرب بىلن اورىلگنده، نېچه يومه لب کېتر اېدى! لېکن بو حرکت بىلن تاکسى قتيق قيمىر لب کېتدى-ده، اېشىک همان آچىلمه دى!

سېمىز آدم نىنگ باش-يوزلريدن تېر آقىب، اۇزى اېسه چرچاغدن هرسىللب قالدى. شونده هيداوچى ينه "غت-غت" قىلىب:

بوگون نيمه بلا بۇلدى اۇزى! هېچ بيرىنگىز نىنگ قۇلدىن بير ايش کېلمه يدى. بيرىنگ اېشىكىنى ياپالمه ي، بيرىنگ شيشه نى کۇته رالمه ي، اېندى اېسه باشقه بيرىنگ اېشىكىنى هم آچالمه ي قالدىنگلر-توبه! دېب جلودن توشدى و اورا-اور فىلملرى نىنگ باش

قەھرىمانلىرى كىبى كۆكسىنى ايلگرى چىقرگن حالده گېردەيىب، بو تامان كېلدى.

ھىداوچى، قۇلىنى اېشىك اوشلە گىچى(دستگىرەسى)گە قۇيىب مغرورلرچە: اكه منە بونداق تارتسنگىز بۇلمەيدى مى، دېب اۋزى تامان تارتدى. بىراق اېشىك اچىلمەدى!

ھىداوچى بو گل بار كوچى بىلن يىنە بىر نېچە قتله اېشىكنى اچماقچى بۇلىب، اوشلە گىچنى تارتدى. بىراق اېشىك خودى ولدىنگ بۇلگندېك، ياپىقلىگىچە قالەبېردى!

بو اورىنىشلر و خجالت نتيجهسىدە ھىداوچى نىنگ باش-اياغىدن تېر آقە بېرىب، او اېسە گاه قۇلىدەگى كىر صافىسى و گاه ھم بېنگى بىلن يوز-پىشانەسى و بورنىنى ارىتىب تورر اېدى. بارە-بارە او چىدمىنى قۇلدىن بېرىب، اچىق بىلن تىلى نىنگ تگىدە بىلە دىگن بار سۇكىنج لرنى تاكسى نىنگ آتە-بابالرىگە تۇكىب ساچدى! او، بىر اياغىنى تاكسى گە ترەب، اوشلە گىچنى محكم توتىب، اۋزى تامان زۇر بېرىب تارته باشلەدى. شوندا تاكسى و اىچىدەگى بىز يۇلاوچىلر خودى سوو يوزىدەگى قايقدېك سىلكىنىب تورسك ھم، بىراق اېشىك خودى اچىلمىلىككە آنت(قسم) اىچگندېك، اصلا اچىلمەدى!

شو تىرت و كىش جىرانيىدە كوتىلمە گندە اوشلە گىچ سوغرىلىب كېتىدى و ھىداوچى بار آغىرلىگى بىلن ارقة سىگە، سر ككە آتلىب يىقىلدى!

او زۇرغە يېردن تۇرىپ، آغرىگن يېرىنى قۇلى بىلن اوقە لب،
اېشىك نىنگ حالى ھم ياپىقلىگىنى كۇرىپ، اچىق بىلن آغزىدە گى بار
توفى نى يېرگە توفلەدى-دە، تىلى نىنگ تگىدە بىر نىمە لرنى شىبىرلب،
تاكسىنى بىر تىپدى!

او مېن تامان كېلدى و قۇلىدە گى حالىگى اوزىلگن اوشلە گىچ نى
مېنگە كۇرسە تىب:

بو اوشلە گىچ "فورد" نىكى. شو باعث، گاهىدە بېسورلىك قىلىپ،
اچىلمەى قالەدى! اېندى بىران مسترى تاپىپ، اېشىكنى اچتىرمە سم
بۇلمەيدى، دېدى!

مېن اېسە بو وضعىتنى كۇرىپ، ھىداوچى تامان اونىنگ ياردمى
بىلن اۇزىم نى زۇرغە چىقەرىپ، تاكسى دن توشىدېم! و حالىگى سېمىز و
كتە قارن آدمگە قرەب:

اې آغە ينى، اېشىك اچىلماقچى اېمس شېكىللى. يىخشى سى
سىز ھم مېن توشگن يۇلدن توشىنگ! دېدېم.

شوندە ارقەدە گىلر ھم سۇزىمنى تصدىقلىق قۇيدىلر. ھىداوچى ھم
اونى خودى مېن توشگن يۇلدن توشىش گە اوندەدى.

سېمىز و كتە قارن آدمگە ھىداوچى تاماندن توشىش قنچە لر
قىين بۇلسە ھم، او زۇرغە اۇزىنى اوشە تامان سىلجىتماقچى بۇلدى،
بىراق قىلالمەدى. ھىداوچى اونگە ياردم بېرماقچى بۇلىپ، بونداق
قرەسە، اونىنگ كۇيلگى ھمدە اېگنىدە گى كورتى سى نىنگ اېتكلىرى

تاکسی نینگ ایشیگی اره سیده قالگن اېکن!

بونی قره ننگ که، اېندی ایشیک اچیلمس و کیملر هم ایشیک اره سیده قالگن اېدی. اولر نینگ یېچیش امکانی هم یوق و کیملرنی قیرقیشگه اېگه سی نینگ یوره گی بولمس اېدی. سېمیز آدم، هیداوچی نی هم، تاکسی سینی هم سؤکه باشله دی...!!

مېن اېسه کېچیککنیم باعث، بو واقعه نینگ عاقبتی نیمه بیلن توگه شی گه قره مه ی، ایشخانهم تامانگه یول آلیب کېتدیم!

کابل - عقرب ۱۳۸۵



مکان بیت‌الخلایق لر رازی!

بیرپیتلر تلویزیونده عجایب و قیزیقرلی کیچیک بیر تمثیلی پارچه نی کؤریب، برچه لر کولیب، عین حالده اونى مبالغه، دېب اؤیلر ابدیلر. او تمثیلی پارچه شوندن عبارت ابدی که بیر کیشی کته یؤل بؤیی پیاده‌رونی اریقچه‌گه اؤخشش قازیب باره‌یاتیب، ارقه‌سیدن اېسه ایکینجی آدم او قازیب چیقرگن توپراقلرنی قیته‌دن اریقچه‌گه تشلب، تۆلدیریپ بارر ابدی!

شونده یؤلاوچیلر اولرنینگ بو عجایب ایشیگه حیرت بیلن باقیب، جمله‌دن بیر کیشی ایکینجی آدمدن:

ای اوکه، نیمه اوچون بو بیرنی بیرینگ قازیب، باشقه‌نگ اونى قیته‌دن تۆلدیریپ باره‌یاتیب‌سیزلر؟! دېب سؤره‌بدی.

تۆلدیرووچی کیمسه اېسه:

بو ایشنی بیز اوچ کیشی اجاره آلگنمیز. یریمیز قازه‌دی، ایکینجی‌میز کپبل تارته‌دی و مېن اېسه اونى قیته‌دن تۆلدیره‌من.

كېلىچى مىز كېلمە گن. شو باعث، او آدم اۋز ايشىنى بَجَرىب قازماقده و مېن ھم اۋز ايشىمنى قىلىپ، تۈلدىرماقدهمن! دېجواب بېرىدى.

اۋشە يىتلر تلوزيونده كۈپىنچە شو پارچە قۇيىلر اېدى و بىز كۈرووچىلر اېسە اونى كۈرىپ، اۋلكە مىزىنىڭ بونداق سىرانجامسىز و كولگىلى ايشلىرىگە ھم كولىپ، ھم اچىنر اېدىك. حتى كۈپلر اونى شونچە كە كۈنگىل اچر كومىدى پارچە صفتىدە كۈرىپ، ھە-ھە-ھە لب كولىشدىن اۋزگە نرسەنى اۋىلەمس اېدىلر.

بو پارچە كۈرىنىشىدە قنچە لىر مبالغە لى و كولگىلى بۈلسە ھم، بىراق اونىڭ تگىدە جامعه مىزدە گى جودە كتە حقيقت ياتگن اېدى. مېن بو حقيقتنى يەنە بىر قتلە، بىراق باشقە بىر شىكلدە كۈردىم. بو گل، مسألەنى شونچە كە تلوزيو پرده سىدە ھنرمندلر تامانىدىن اېمس، بلكە حقيقى يۈسىندە تورموش ساحە سىدە يقال كۈردىك!

سىز سۈزىمگە ايشانمەى، بلكە اويقونگىزدە كۈرگن سىز دېرسىز. بىراق مېن كۈرگن نرسە تمثىلى پارچە گە اۋخشش، اما چىن حقيقت دىر. ھە، اويغاقلىكدە كىمىنەنىڭ اۋزى منە شو ايكى گناھكار كۈزلىرىم بىلن كۈرىپ، بار حواسىم بىلن سېزگن من.

ايشانمە سىگىز منە مېن كۈرگن نرسەنى اقىزمەى-تامىزمەى، ھېچ بىر مبالغەسىز ايتىپ بېرەمن. اۋشندە بلكە ايشانچ حاصل قىلرسىز.

بىز ۱۳۸۴-يىلى ياز فصلىدە پارلمان سىلاولرى جريانىدە ولايتىمىزنىڭ كۆپلەش شەھەر و قىشلاقلارنى قدم-قدم يوريب كۆردىك. بو سىر و سفر اقمىدە كۆپلەش قىزىقلى نرسە لرقارى عجاب بىر نرسە گە ھم گواھ بۆلدىك. قىشلاقلردن بىرىگە يقىن بۆلگنىمىزدە اىكى-اوپتە اېسكركن بىرتىق خىمە نى كۆردىك. اولر اىچىدە توپراقلرگە بولنگن، بىر اوستىگە اۆلتىرگن اۆقووپلر بار اېدى. بو خىمە لردرواق قىشلاق مکتىبىنىڭ صنفلىرى اېدى!

صنفلردن چمە سى ۵۰ متر نىراقدە سمىت، تاش و پىشىق خىشتن قورىلگن مكالنر بناسى ادملرنىڭ دقتىنى اۆزىگە تارتىر اېدى. مكالنرنىڭ اېشىگى تېمىر، اوستى اېسە اھنپۇش قىلىنگن اېدى!

بىز بو تاماندە بالە لردس اۆقىيدىگن بىرتىلگن اېسكى خىمە لر (صنفلر) و او تاماندە كانكرىت، اھنپۇش و تېمىر اېشىكىلى اّاق بۆيلگن مكالنرنى كۆرىب خىرتدە قالدىك و بى اختىياراېسىمىزگە "اىچكرىدە اؤن يۇق، تىشقىرىدە قۇش تىدىر!" دېگن دانا خلقىمىزنىڭ ھكىمتلى سۆزى كېلدى.

بىز اۆشە زھاتى بو عجاب اىش نىڭ سببى نى بىلمە دىك... باشقە كونى سفرىمىز چاغىدە قىشلاقلردن بىرىدە ىنە بىر مکتبگە اوچرە دىك. بو مکتب نىڭ ھالى اىلگرگى مکتبىن ھم قىزىقلىرى اېدى.

قنداق؟! دەپسىزمى؟

اونده اېشىتتىنگ: بو مەكتەب نىنگ بېچارە اۇقۇوچىلارگە حتى اېسكى و يىرتىق خىمەلر ھەم يۇق اېدى. بالەلر ياز فصلى نىنگ جىزىرە مە ايسىغىدە، يېرگە اۋلتىرىپ درس اۋقىماقدە اېدىلر. بىراق قىزىغى شوندا اېدى كە، عىنئ اىلگىرى حكاىە قىلگن مەكتەب نىنگ مەكانى دەپك بو مەكتەب نىنگ يقىنىدە ھەم كانكرىت، اھنپۇش، تېمىر اېشىكىلى اۋقۇق مەكانلر بار اېدى!

بىز بو ھالى كۇرىپ، اىلگىرىدىن ھەم كۇپراق ھىرت و سىنچكاولىگىمىز اشدى. لېكن ھەرقلەى شۇرپىشانە اۇقۇوچىلر درسلىرىنى ناقولەى يېردە اۋقىسەلر ھەم، بىراق لاقل بو چىرايلى مەكانلرگە بارىپ، بىراز تىنچراق و راحتراق "رفە حاجت" قىلسەلر، شونىسى قەيېردە، دەپ اۋزىمىزنى تسكىن بېردىك!

بىراق بو ھالى ھەمەسى اېمس اېدى. چونكە بو قىشلاقدىن اۋتېب، پاليزلر و دىمە اېكىنلر بۇىلب كېتىپ، ابادانچىلىك توگەدى و چۇل و بىبانگە يېتىدىك. بىراز يۇل يورىپ، ھېچ بىر ابادلىك بۇلمەگن و آدم ذاتى يشەمەيدىگن قوپە-قوروق انە شو چۇل نىنگ اۋرتەسىگە يېتگنىمىزدە، اوزاقدىن اۋقۇق و نىسبئ كىچىك بىر بنا كۇرىندى. يىخشى يقىن يېتىپ بارىپ قرەسك، نې كۇز بىلن كۇرە يلىك كە او ھەم

ايلگرىگى مكانلرگه اۇخشش پخته، آھنپۇش و تېمىر اېشىكلى بىر
مكان اېكن!

بونىسى اېندى برچە سىدن قىزىق بۇلدى. برچە مىز چىندن ھم
حىرت و سىنچكاولىك دېنگىزىدە چۇمىب كېتىك! بىر-بىرىمىزدن
قنچەلر بو عجايب ايش نىنگ دىلىلى يا كە رازىنى سۇرەسك ھم، بىراق
ھېچكىم بو حىرتلنرلى نرسە نىنگ رازى يا كە دىلىلى گە بىراق قانىقرلى
نرسە تاپالمەدى. ايلگرىگى قىشلاقلردە بىرتە-اىكىتە دن سۇرە گنىمىزدە،
اولر قاش و بىلكە لرىنى قىمىرلە تىب: بىلمە دىك، بىر نېچە آدم كېلىب،
ھېچكىم دن سۇرەمسدن منە شو مكانلرنى قورىب كېتىلر، دېدىلر!

بو مكان ھم خودى باشقە لردېك بىر نقشە و اۇلچمدە چىرايلى
قىلىب قورىلگن اېدى. مكانلرنىنگ شىنملىگى و چىرايلى لىگىنى
كۇرىب، ھرقندا ق آدمنى ھم ھوسى كېلىب، اونگە كىرىب، "طھارت
سىندىرگىسى" يا "رفع حاجت" قىلگىسى كېلر اېدى!

چىندن ھم بىزنىنگ يۇلداشلىرىمىز، چۇلدە گى مكانلرنى كۇرىب،
چىدالمەى بارىب فايده لندىلر!!

بىلە من، بو سطرلر ارقلە لى اوشبو فانتاستىك(تخىلى) داستانلرگە
اۇخشش حكاىە نى اۇقىب تورگن سىز عزیز اۇقووچى ھم خودى بىز
كېى بو چىرايلى مكانلر قورىلىشى نىنگ رازىنى بىلماقچى بۇلىب

تورپ سىز و بونداق ايش، قنداق بۇلىشى مەمکن؟ دېب تورگن سىز!

چىندن ھەم بىرىنچى و اىكىنچى مەكانلار ھېچ قنداق تەمىر و سەنگە اېگە بۇلمەگن مەكتەبلەردە، اۇقۇوچىلار فەيدەلەنەنشى اوچون توجىيە بۇلەدىگن دلىل بۇلسە-دە، بىراق بو قوپە-قوروق چۇلگە كېلىب، بونداق پختە مەكانلارنى قورىشىدە قنداق بىر راز بار اېكن، دېب اۇيلاوگە توشەدى كىشى.

بىز اوچون بو رازنى بېچىش و مسألەنى ايدىنلشتىرىش جودە قىزىق اېدى. شو اوچون، بىر نېچە قىشلاققە بارىب، اىرىم ياش-اولوغلار، اماملار و قىشلاق باشلىقلىرىدىن مەنطقە لرىدە گى قورىلگن بو عجاب مەكانلار حقىدە سۇرە دىك. نەھەت، بو مەمانىنگ بېچىمى تاپىلدى.

ايتىشلىرىچە، طرار و جرار "اىنجو"لردن بىرى، قنداق دىر يۇللار ارقلە بىر نېچە ولايت مەكتەبلىرى اوچون "مەكان" قورىش پروژەسى نىنگ امرى و بودجەسىنى االەدى. "مەكان" قورووچى "اىنجو" سەرت بىلەن پروژە نىنگ رىجە لشتىرىب، بىرچە مەكتەبلەر اوچون اىخچەم، پختە و چىرايلى مەكانلارنىنگ نەقىشەسىنى توزەدى و دراو قورىلىش ايشلىرىنى باشلەب بىبارەدى!

اېندى كۇپلەب قىشلاقلىرىنىنگ مەكتەبلىرى اوروشلردە مەرفتگە

قرشى ياووز كوچلر تامانىدىن بوزىلىپ، كويدىرلىپ، حاضر تعميرگە ابگە ابمس ابديلر. ابنگ بختلى اوقوويچلر فقط بير نېچىتە خيمە گە ابگە ابديلر. ايريم يبرلردە حتى مکتبدن اثر هم يوق ابدى و حالىگچە تأسىس ابتىلمە گن ابدى. بونى قرەنگ كە انه شونداق بير پىتدە مكان قورووچى چوتار "ابنجو" جايلردە مکتب بۇلگن يا بۇلمە گنى گە قرەمەى، پخته و اساسى "مكان" لر قورە باشلە گن!

قىزىغى شو كە، ايلگرى ايتىب اوتىلگن بۇم-بۇش بۇلگن چۇلنى هم "مكان" قورووچى "ابنجو" اوزاقنى كۇزلب، غمىنى يىگن. بلكە يىللر اوتىب او يبرلردە آدملر اوتراقلە شىب، كپىن مکتب تأسىس ابتىلر يا هېچ بۇلمە گندە، بىزلردېك اوتگن-قىتگن آدملر ضرورتلىرىنى رفع قىلر، دېگن خيال بىلن آلدىندن شىنم، چىرايلى و پخته "مكان" لرنى قورىب قۇيگن!

درواقع، مكان قورووچى "ابنجو" مکتب بار-يۇقلىگى، تأسىس ابتىلىش يا ابتىلمسلىگى گە قرەمەى، او اوز ايشىنى بجرىب، مكانلرنى قورىب، كتە پوللرنى چۇنتگى گە اورىب كېتگن، خلاص!

ابندى بلكە بو عجايب ايش نىنگ دلىلى و نھاىت تلویزيوندە گى كىچىك تمثىلى پارچە نىنگ چوقور فلسفە سىنى بىلگن دورسىز!

كابل - ميزان ۱۳۸۵

مەھل ایسلەتیش

باي بوبە! سىزىلر نىمە اوچون سۆزلىشكە ھەرنەرسەگە بىر مەھمەل ھەم
قۇشيب: "مۇتر-پۇتر"؛ "پول-مول" يا "مدىر-پودىر" دېسىزىلر؟!
او كەم ناتۇغرى اېشىتىب سىز. بىز ھېچ قچان بوندى ھى دېمە يمىز.
اونى بىران "قىشلاقى-مىشلاقى" ایتەدى!!



كرانمايه شاعر!

يازىنىڭ اېنىق كۈنلىرىدىن بىرىدە، دۇستلىرىمىزدىن بىرىنىڭ مېھمانخانىسىدە مەمۇلگە كۆرە بىرچە دۇستلار، ائىنىقسە شەر و ادب مەخلىلىرى تۇپلىنگان اېدىك. مەجلىسدە شەر يازىش و شەر اۇقىشىگە اشدى مشتاق دۇستىمىز مىرزا اكه بار و مەجلىس اھلىگە يىنگى ايتىگن شەرلىرىدىن اب و تابى بىلن اۇقىب بېرماقدە اېدى.

شۈندە مېزبان ھزل يۈزە سىدىن: مىرزا اكه، شەر اۇقىش نىنىڭ اۈزىدىن مەخسۇس اصول و يۇرىغى بۇلەدى. اكر شاعر اۈز شەرلىرىنى بوتون احساسى، يۈز-كۈزى اىما-اشارەلىرى و بدن ھركتى و بېچ و تابى بىلن بىرگە مەخسۇس اھنگدە اۇقىسە، تىنگلاوچىلرگە يىخشى تاثير قىلەدى، دېدى!

مىرزا اكه بو سۇزنى اېشىتىگچ، ”كرگە اېشىتتىر، كۈرگە توتتىر!“ دېگنلرېدىك، دراۋ بوتون احساس و بدن ھركتلىرى بىلن شەرلىرىنى اۇقىي باشلەدى. از مدتدن سۇنگ مىرزا اكه شۈنچە احساساتگە بېرىلىپ ھىجانلندى كە، اۈرنىدىن نىم خېز-نىم خېز تورىب، اۈلتىرىب،

قۇلىنى سىلتىپ، كۆزىنى يومىپ- آچىپ، قاشىنى قاقىپ شعر اۇقىشىگە دوام اېتىدى. بوتون مجلس اھلى مرقاق بىلن مىرزا اكە نىنگ حىياتىگە بېرىلىپ، ھىجانلى اۇقى ياتىگن ھر بىر مصرع سىنى اېشىتىپ تورىگن بىر يېتتە، كوتىلمە گندە مىرزا اكە "واخ!" دېپ بىردن اۋزىدن كېتىپ يىقىلدى.

برچە مجلس اھلى تشوېش گە توشىپ: ھى، مىرزا اكە! سىزگە نىمە بۇلدى؟ كۆزىنگىزنى آچىنگ! دېپ او كىشىنى ھر قنچە تە-تەلب، يوزلىرىگە استە-استە اورسە لىر ھەم، مىرزا اكە حالگە كېلمەدى. بىر كىشى يوزىگە ازگىنە سوو سېپىدى؛ ىنە بىرى بىر آز لىمونى شىرت قىلىپ ازىگە قويدى؛ كىم دىر قۇل-اياقلىرىنى اوقەلب توردى....

نھايت، بىر نېچە دىقە دن سۇنگ، مىرزا اكە ازگىنە كۆزىنى آچىپ، ھۇشىگە كېلدى. بىراق سۇزلىشىگە مدارى بۇلمەدى. او، يانىدە تشوېش و اضطراب بىلن تىكىلىپ تورىگن بىز اۋرتاقلرگە، زۇرغە قۇل اشارەسى بىلن اونى اويىگە جۇنە تىشىمىزنى بىلدىردى.

شوندە، مىزبان دۇستىمىز و باشقە اۋرتاقلر دراو بىر تاكسى چقىرىپ، مىرزا اكەنى اويىگە بىباردىلر....

شو بىلن بىر ھفتە-اۋن كون مىرزا اكە اويدن چىقمەدى، دركسىز يۇقالىپ قالدى. بىر ھفتە-اۋن كون اۋتىپ، بىر كونى حالىگى مىزبان

دۈستىمىزنىڭ اېشىكى نى كىم دىر تقيە تىدى. او اېسە چىقىب قرە سە، اېشىك آلدىدە مىرزا اكە عصاگە سويە نىب تورگن اېمىش. سلامش و حال-احوال سۈرە شگندن سۈنگ، دۈستىمىز مىرزا اكە نى مېمانخانە گە باشلىدى. مىرزا اكە اېسە هىنقىللب، چتە ناق يورىب مېمانخانە گە كىرىب اۋلتىرىدى.

شوندە مىزبان مىرزا اكە دن:

مىرزا اكە، اۋشە كونى سىزگە نىمە بۋلدى؟ بىردىنگە ھۋشىنگىزدن كېتىب، بىقىللب قالدىنگىز. ھالى نىمە اوچون عصا آلب، چتە ناق يورىب سىز؟ دېب سۈرە بدى.

مىرزا اكە دېدى:

اې دۈستىم، اصلدە مېن سىزنىڭ قۋلىنگىزدن شو كۋىگە توشدىم. نىمە اوچون دېسنگىز، اۋشە كونى سىز، كىشى شعرنى احساس، ھىجان و بدن حرىكلىرى بىلن بىرگە اۋقىسە، تىنگلا وچىلرگە كۋپراق تاثير قىلە دى، دېدىنگىز. مېن سادە ھم شونداق قىلدىم. ھىجانلە نىب نىم خېز بۋلېب، اۋلتىرىب شعر اۋقىگىنمە مایە لىرىم تگىمدە قالىب، ھۋشدن كېتىب من. منە ھالى ھم شىش و آغرىغىدن ىخشى يورالمە ى من!

مىزبان دۈستىمىز اېسە مىرزا اكە نىڭ سۈزلىرىنى اېشىتىب،

کولیم سیرەب:

میرزا اکە، عەبید زاکانی نینگ "زەستان آب بینی و تابستان خایە
دراز" دېگنی بۆلیدی! سیز قیغورمەنگ، اېندی بۆلر ایش بۆلیدی. لېکن
بوندن بویان، سیز "شاعر گرانمایە!" بۆلدىنگیز، دېدی!!

میرزا اکە ساغە ییب، آلدینگیدن ھەم چقانراق یورە دېگن بۆلگن
بۆلسە ھەم، بیراق ھزلچی دۆستیمیز قۆیگن لېقبدن قوتیلالمە، ھمان
"گرانمایە شاعر!" دېب ایتیلیب كېلماقده. گاهیدە بیرار جايدە اصل
واقە دن خەرسیز کیشی باشقە بیرار آدمنى تعريفلب یا کە حرمت
یوزە سیدن "گرانمایە شاعر"، دېب قالسە بار می؟ واقە دن خېردار
کیشیلر درآو بېر-بېرلریگە کولیم سیرەب باقیب قۆیە دیلر یا او کیشیگە
اعتراض بیلدیریب: بیزدە فقط بېر "گرانمایە شاعر" بار، او ھەم بۆلسە
البتە آسانلیکچە بو عنوانگە اېریشمە گن، دېب میرزا اکە نی
کۆرسە تە دیلر!

سریل-یاز، ۱۳۸۴



شعري معمار

ميرزا اكه شعريت عالميده دايم اينتيليب سير اېتووچى و بويوك دېنگيزده اېسه هميشه سوزيب يورووچى كيشى دير. شو باعث، او كېچه-يو كوندوز تورلى شعرلر ايتيب، اۇزى نينگ طبعى نى صيقل بېرر و شعري اشتياقى نى بيرآز بۇلسه هم قانديريب يورر اېدى.

بيركونى ادبي اۇلتيريشلر يميزدن بيريده، نوايى نينگ معماگه قيزيقيشى و معما ايتته آلمه گن و معمانى يېچالمه گن كيشيلر اونينگ دورده و مجلسلريگه كيرالمه گنى حقيده گپريلدى و مثاللر اۇقيلدى. شوكوندن باشلب، ميرزا اكه هم شعريت نينگ انه شو قيين و چيگل ژانرى، يعنى معماگه ميل و مراق تاپيب قاليب، كۇپل معما يازه باشلهدى.

بيركونى بيز اورتاقلريگه بو حقهده خوشخبر بېريب، گلگى (نوبته گى) ادبي اۇلتيريش يميزده معمارلر يمدن اۇقيب بره من، دېب ايتدى. بيز اېسه، بو گل ينه ميرزا اكه دن قنده ي قيزيقرلى نرسه لر اېشيتير اېكنمىز، دېب صبر سيزليك بيلن اۋشه كونى كوتيب تورديك!
نهايت، ادبي ييغين كونى هم يېتيب قالدى. شعر و ادبياتگه

مخلص بىرچە ئورتاقلىرى بېلگىسى لىنگىن يېردە جەمەتتە بۆلۈنۈپ، بىراق، نېگە دېر مىرزا ئەكىننىڭ ئۈزى كېچىكىيىپ، ھالى كېلگىنى چە يۇق ئەدى. بىز بېسە، ئەلىدىن مىرزا ئەكىننىڭ مەملىرى قىنداقلىقىنى نى بېلىپ، ھەممىز ئونىڭ ھەر بىر مەملىسىنى جە قىيىن ۋە چىگەل دېگەن كۆرسەتەتەن، بېچىمى يىقىن ۋە تۇغرى كېلە دېگەن ھېچ قىندە ي سۆزىنى ئەتمەسلىك ۋە ئۈزىمىزنى ئەتەتە بىلمەسلىك ۋە گۈللىككە سالىشىگە قىرار قىلدەك!

بىر ئاز مەتتە ئۆتەتەن، نەھەت مىرزا ئەكىن كېلىپ قالدە ۋە ئونىڭ تۇرىدىن ئۈزىن ئەلىب ئۆلتەردە. ھال-ئەھۋال سۆرەشكەن سۇنۇگ ئەدى بىھت، ئەنى مىرزا ئەكىننىڭ مەملىرىنى بېشىتەش ۋە بېچەش باشلەندە.

مىرزا ئەكىن بىرىنچى مەملىسىنى قۇيىدە گېچە باشلەندە:

“قەقە ئەدى ھەر بېلە تەگىدە ئەپەغ ئە؟”

قە تەپىنەگەر-چە! دېدە مىرزا ئەكىن.

دەخت ئەمەس مە؟

يۇق.

ھۇز!

يۇغ ئە، بىلمە دىنەگىز. بىر ئاز يەشى ئەپىنەگەر!

بەق ئەكىن ئەپەسە مە؟

يۇغ ئە، مە سەزەر!

مىرزا ئەكىن جە قىيىن مەملىسىنى سەزەر. ئەزەنە ئەسەنەق بۆلگەندە تەپەر

ئەدەك!

ينه بىر كىشى: مىرزا اكە، بو گل اۋزىنگىز بو معمانىنگ
بېچىمىنى ايتىب بېرىنگ، دېب التماس قىلدى.

شوندا مىرزا اكە دېدى:

اې سادەلەر، بو معمانىنگ جوابى تاووق-كو!

واى مىرزا صاحب، قرەنگ تاووق شونداققىنە تىللىمىزنىنگ اوچىدە
بۇلىب، ايتالمىب بىز. اونداق بۇلسە، باشقە بىرار اسانراغىنى ايتىنگ-
چى! دېدى دورەدە گىلردن بىرى.

مىرزا اكە برچەمىزنى منت قىلىب، ميهلرنى ايشگە تشلەشىمىزنى
تاكىدلىب، ايگىنچى معماسىنى بوندا اۋقىدى:

”اوزون-اوزون دۇملرى قىپ-قىزىل دور تاجلرى

تاووقلرنى باسەدى ، تانگدە اذان ايتەدى؟“

همەمىز قاە-قاھلب كولىب: مىرزا اكە بو معمانگىز جدا چىرايلى
بۇلسە هم، انچە قىين كۇرىنەدى، دېب ھزلىشدىك.

مىرزا اكە: پروا قىلمىنگلر، كۇشش قىلىب ميهنى ايشگە

تشلەسنگلر تاپەسىز، دېدى غرور بىلن!

تېلفون مى؟

يۇغ، كۇپ اوزاق كېتىدىنگىز!

تراكتور-چى!

يۇغ. سىزلردە ميه دېگن نرسەنى اۋزى يۇق اېكن-دە!

مۇذن اېمس مى؟

آفرین! یقین بۇل دینگیز!!

مؤتر می؟

یۇق، پخمه لر! شونی تاپالمه دینگلر می. بونینگ جوابی خۇراز-

کو!

همه میز میرزا اکه نی تحسین قیلیب، معماده استعدادی بی نظیر،

دېب ینه بیرار اسان معما ایتینگ، دېب التماس قیلدیک.

شونده میرزا اکه همه میزنی ملامت-سلامت قیلیب، کۇرذهن و

میہ سیز، دېب قوییده گی معمانی اؤقیدی:

”اوزون-اوزون قولاغی قپ-قره دور تیاغی

ایخ! دېسنگیز یوره دی ایش دېسنگیز توره دی؟”

برچه میز بو معمانی اېشیتیب، کولگودن قاتیب قالدیک. میرزا

اکه نینگ کۇشش و دعوتی بیلن بیرآز تینچیب، بو قیین معما حقیده

نوبیت بیلن فکریمیزگه کېلگن و معما یېچیمی گه اصلا یقین بۇلمه گن

نرسه لرنی ایته باشله دیک:

دریا می؟

یۇق، نیمه بۇلدی؟ همه ننگ کۇرذهن بۇلیب قال دینگلر!

بیز کۇرذهن اېمس میز، سیز نینگ معمالرینگیز جدا قیین اېکن-

ده!

بلیق-چی؟

یۇق. بلیق نینگ تیاغی نی کۇرگن می سیز؟!

چومالى (مورچە)!

يىلمە دىنگىز! چومالى نىنگ قولاغى بار مى؟!

كىم دىر بلند تاووش بىلن:

مىرزا اكە اۋزىنگىز اېمس مى سىز؟ دېدى!!

بركە الله! كۇپ يقىنلشدىنگىز! ھە، كۇشش قىلىنگر!!

ھەمە قاە-قاە اورىب، كولگىدن اىچكلرىمىز اوزىلگودېك بۇلدى.

مىرزا اكە اېسە كولگىلر و ھزللرنى ھېچم اۋزىگە آلەمە، برچەنى

سكوت و اۋىلشگە چارلب:

قنى باشلنگر-چى! دېدى او.

يىخچال اېمس مى؟

يۇق، اصلا!

چىركت-چى!

يۇق، جدا اوزاقلشدىنگىز.

مىرزا اكە بو معمانگىزنى ھم يىچىش علاجى بۇلمەدى. التماس

شونىنگ يىچىمىنى ھم اۋزىنگىز ايتىب بىرىنگ!

اى كلتە فەھملر! كۇپ يقىن بۇلىب تاپالمە دىنگر! بونىنگ جوابى

اۋزىمىزنىنگ اېشك-كو!....

شونداق قىلىب، اۋشە كونى كېچقورون گچە مىرزا اكە دن اۋنلن

انە شو خىل عجايب معمالرنى اېشىتىب، اۋز ارا كېلىشىلگن حالده

اولرنىنگ بىرارتە سىنى ھم يىچىش گە موفق بۇلالمەمە، اولرىمىزگە

جۇنە دىك! مىرزا اكە بۇلسە، اۋزى نىنگ مەمەلرىگە فخرلە نىب،
استەدادىدىن مەمنون بۇلىپ اوىى گە كەتدى!

آزەتلىنى اۋنومنىك!

تۇرە قۇل خان! سىز و خاتىنىنگىزنىنگ يېتى پىشترىنگىز اۋزىپك
بۇلە تورىب، نىمە اوچون اوىدە درى گىپرىب، برچە بالەلرىنگىز درى زىبان
بۇلىب، اۋزىپكچە نى بىلمە يدىلر؟! سىزلر اوىدە بالەلر بىلن اۋزىپكچە
سۇزلە گىلرىنگىزدە، بوكون اولر اۋز اۋنە تىللىرىنى اۋنوتەمە گن بۇلر اېدىلر!

تۇرە قول خان بو اچىق، بىراق چىن سۇزلرنى اۋرتاغىدىن
اېشىتگىچ، يورە گىدە ملي حس-تويغولرى النگە الىب، خجالتىن يوزىگە
قان يوگورىب، پىشانە سىگە اېسە تېر تامچىلرى پىدا بۇلدى و يانىدە
تورگن اۋغىللىرىدىن بىرىگە قرەب، جدى اھنگدە دەدى:

بەروزجان! پس از اى كۇشش كۈنىن كه به زبان مادرى خود
"اۋزىپكى" گپ بزىنن، فەھمىدى جانىم!!

شاعر لر مطایبه سی

أیریم تذکره لر و علمی-تاریخی کتابلرده روایت قیلش لر یچه، میر
علشبر نوایی نینگ دؤستی و سلطان حسین میرزا باقرانینگ اولوغ
عملدارلردن بؤلیمیش شاعر شیخیم سهیلی قوییده گی مطلع لی بیر شعر
یازکن ابکن:

”شب غم گرباد آهم از جا بُرد گردون را

فرو بُرد اژدهای سیل اشکم ربع مسکون را“

سهیلی اوشبو مطلع نی مولانا جامی حضرتلری نینگ فکری نی هم
بیلیش اوچون، او کیشی گه اوقیب ببرییدی.

مولانا جامی بو بیتنی ایشیتیب، کولیم سیره ب سهیلی گه:

شیخیم، سیز شعر ایته سیز می یا آدم قورقیده سیز می؟ دېگن
ابکن.

بونی قره ننگ که، بېش یوز ییل اؤتیب انه شونده ی عجایب
مطایبه بیزنینگ عصریمیزده بیرآز باشقه چه مضمونده قوییده گیچه
تکرار بؤلگن:

ادبي انجمنى ميز رحمتلى استاد قارى محمد عظيم عظيمى
توغىلگن كونىنى نشانلىش اوچون بير علمى كنفرانس و مشاعره
محفللى اوتكزماقچى بولدى.

شونده كۆپل شاعر و اديبلر تامانيدن تورلى شعر و مقاله لر
كبلدى. جمله دن شاعرلرلىككه كته دعاگرلردن "زورمه-زوركى" شاعر
ميرزا اكه هم مرحوم عظيمى وصفىگه ايتگن بير شعرىنى كېلتىريب،
كۆزلنگن مشاعره ده اوقيش نيتىنى بيلدىردى. او كىشى ايتگن
شعرنىنگ مطلعسى شوندهى اېدى:

"عظيمى عجب زيبا و خوش اندام اپردىلر"

قاشلرى كمان، كۆزلىرى بادام اپردىلر"

شونده، ظريف شاعرلرئيمىزدن بيرى ميرزا اكه گه دېدى:

ميرزا اكه، بو شعرنى مرحوم عظيمى گه ايتىب سىز مى يا كه
معشوقه نگىزگه؟!

كابل - حوت ۱۳۸۵



«ئەمورەك» قۇرقۇمى!

قىش فەلى و اىچكى اوروشلر اوجىگە يىتگن پىتلىرى اېدى. مېن و بىر گروه ھنرمند دۇستلر ترمذ شەھرىدە كىنستلرنى اۆتكەزىپ، مزار شريف نىنگ "مزار ھوتلى" دە اۆتراقلىب، شىرغان گە كېتىش اوچون طيارە يا كە نظامى قطارنى كوتىب ياتگن اېدىك.

او پىتلردە بىر يۇللىرى ارقە لى شەھرلر ارا سفر قىلىش دولت كارمىندلىرى، اىنىقسە بىزلردېك فرەنگ و ھنر اھلى اوچون اۆتە خوفلى بۇلىپ، حىيات بىلن اۋىنىش اېدى. چونكە دولت مخالفلرى، دولت ادارە لرى يا كە معارف، فرەنگ و ھنر ساحە لرىدە خدمت قىلىپ يورگىنلرنى "كومىست" و "كافر"، دېب دراۋ اۋلدىرىپ بىبارر اېدىلر. قرەنگ كە بىزنىنگ ارە مىزدە اولر تاماندن حتى "اعدام" گە محكوم اېتىلگن اوازخوان و سازچىلر ھم بار اېدى! بوندىە مشئوم زماندە بىلىم، فرەنگ و ھنر ساحە سىدە گى كۇپلپ گناھسىز استعدادلر جەھالت و ياووزلىك قربانى بۇلدىلر.

قىسقىسە سى شو كە او پىتلردە، اىنىقسە مزار شريف و شىرغان

شەھەرلىرى ارەسىدە گى يۇل نىنگ "تېمورک" دېگن قىشلاغىدىن اۋتىش
حتى نظامى قطارلر اوچون ھم جودە قىين بۇلىب، او بېردن اوروشسىز
و تلفاتسىز اۋتىش امكانى يۇق اېدى. بو "تېمورک" دېگن بېردە
قوراللىنگن آدملىر تامانىدىن اۋنل ب گناھسىز كىشىلر اۋلدېرىلىب يا كە
مۇتردىن توشىرىلىب، تورلى عذاب-آزارلرنى كۇرگندىن سۇنگ، كتە مېلغ
جرىمە عوضىگە قۇيىب بىيارىلگن اېدىلر.

ھە، بىز اېسە "تېمورک" قۇرقوويدىن قىرىب اىكى ھفتە دن بېرى
قىش نىنگ قەرە تان ساووق كونلرىگە ناچار چىدەب، ھوتلدە ياتگن
اېدىك. انە شوندى اى اغير بىر پىتدە، شاعر اۋرتاغىمىز مىرزا اكە قىسى
بىر يوموش بىلن مزارشريف گە كېلگن اېكن. او بىزنى ھوتلدە
اېكنىمىزدىن خبر تاپىب، كۇرگنى ھوتلگە كېلدى. حال-احوال
سۇرەشىب، تورلى شعرى و ادبى ھمدە سفر خاطرەلرى حقىدە صحبتلر
قىلگندىن سۇنگ، توستدىن مىرزا اكە:

نىمە اوچون ھمەنگ شوندى اى ساووقدە بو بېردە ياتىب سىزلر؟
دېب سۇرەدى.

مېن اېسە:

مىرزا اكە، تېمورک دن قۇرقىب، طيارە يا كە قطارنى كوتىب
ياتىمىز! دېب جواب بېردىم.

تېمورك دن نېمه دېب قۇرقه سېزىلر؟! قۇرقمنگلر! اگر سۇزىم نى
اېشىتىب، مېن قىلە دېگن اېشگە عمل قىلسنغىز، تېمورك دن جدا
اسانگىنە اۋتەسېزىلر، دېدى مىرزا اكه.

ھەمە مېز مسافىرىك و قىش نېنگ ساووق كونلرىدن بېزىب
ياتگنېمىز اوچون درآو بېر آواز بېلن او كىشىدن: مىرزا اكه، او قنداق
آسان يۇل؟ سېز ھەرگل او بېردن اۋتگنېنگىزدە نېمه قىلە سېز؟ دېب
ذوقلە نېب سۇرەدېك.

جېم بۇلىب اېشىتىنگلر! آسان يۇلى شوكة، اول ھەمەنگ يىخشىلب
مىكەم طھارت قىلە سېز. كېن يۇلگە چىقىب، يۇل بۇيى
"آيت الكرسى" نى اوچ قتله اۋقىب، اۋزىنغىزگە چوفلە يسېز، بۇلدى. خدا
خواھلسە اېسان-امان كۇزنى يومىب آچكونچە، قرە ب سېز كه
تېمورك دن اۋتىب سېزىلر!

مېن اېسە باشقەلردن پېشداستلىك قىلىب:

مىرزا اكه گېنغىز تۇغرى-كو يە، بشرطى كه تېكورككه
بېتگونچە قۇرقوودن طھارتىمىزنى سقلىب تورالسك، دېدېم!!

مزارشريف-جدى، ۱۳۸۴



یادداشت لرماجراسی!

یادداشتلر هم انسانلر تورموشیده کتّه رول اؤینه یدی. هر بیریمیز کونیده بیرنېچیتّه یادداشت آلیب اؤقییمیز یا که اؤزیمیز باشقه لرگه یازهمیز.

یادداشتلر هم خیل مه-خیل بؤلیب، تورلی آدملر تامانیدن یازیلهدی. شونده ی یادداشتلر بار که "تاش نینگ اوستیگه قوی سنگیز، تاشنی اېریتهدی!" بونده ی یادداشتلر تېگیشلی آدملر نینگ سرنوشتی گه کېسکین ایجابی یا سلبی تأثیر کورسه ته دی. بو تور یادداشتلر، یوقاری عملدارلر و کوچلی آدملر تامانیدن یازیلگن بؤله دی. باشقه بیر تور یادداشتلر، کیشیلرنی پولگه اېگه قیلیشی ممکن. اولرنی "حواله" دېدیله. ینه بیر ی اؤقیگن انسان نینگ یوره گینی لرزه گه تشله یدی! بونده ی یادداشتلرنی سېویشگن انسانلر یازیب، بیر-بیرلریگه بیاره دیله. بیر خیل یادداشتلر هم بار که آدملر نینگ چؤنتگینی بؤشه ته دی! هه، بو یادداشتلر رۇزگار اوچون کېره کلی نرسه لرنی ساتیب آلماق اوچون توزیلگن بؤله دی.

تورموشیمیزده یادداشتلر قنچه لیک مهم یا ضرور بؤلگنلیگی، یوقاریده گی مثاللردن یقال بیلینیب توریدی.

مېن یاشیم کېتگنلیگیدن می یا که شرایط تأثیریدن می، حافظه م اونچه لیک یخشی ایشله مهیدی. شو باعث، عیالیم دایم هر بیر ایشده، اینیقه س بازار-آچار ایشلریده برچه قیلینه دیگن ایشلر و ساتیب آلینه دیگن نرسه لرنی لیست قیلیب، یادداشت یازیب بهره دی. بو نرسه مدتلردن بهری تکرار له نیب، اېندی بؤلسه یادداشت یازیش او بهچاره گه دایمی عادت بؤلیب قالگن!

خاتینیم اېندی یکه مېن اېمس، بلکه اؤغیل-قیزلریمیزگه هم توری یادداشتلر یازیب، قیلینه جک ایشلرنی بویوره دی!

بو یادداشتبازلیکلر جریانیده عجایب کولگیلی یا که ناقوله ی واقعه لر هم یوز بهریب توره دی. جمله دن بیرکونی رۇزگارگه کېره ک نرسه لرنی بازاردن ساتیب آلیش اوچون خاتینیم قوییده گی لیستنی توزیب بهردی:

۱. جوگاری یاغی - ۱ قوطی

۲. قیزیل لوبیا - ۲ کیلو

۳. قوروق سوت - ۱ کیلو

٤. قيزيل مه يز - 1 كيلو

٥. آق سان - ٤ متر

٦. باله لر اسپرينى - ١ تخته

٧. تركارى - بير - بير دسته

٨. شكر - ٣ كيلو

٩. آلمه - ٢ كيلو

١٠. گروپ (١٠٠ شمع) - ٢ دانه

مېن اېسه بازارگه باريب، دوكان مه - دكان قنچه يوريب،
يانيمده گى يادداشت يوزه سيدن دقت بيلن سودالرنى قويده گيچه آيب،
اويگه كېليب من:

١. وطني برنج - ٢٥ كيلو

٢. كته نخود - ٢ كيلو

٣. اسپلاق - ٤ كيلو

٤. آش توزى - ٣ كيلو

٥. لاشتيك - ٦ متر

۶. كلچه - ۱ كيلو

۷. پيجتاب - بير دانه

۸. اصل گوگرد - ۲ درجن

۹. يخشى پخته - ۵ كيلو

۱۰. خالدار كيله - بير درجن.

چرچب-هاريب بازاردن كېلىب، سودالرنى بيرين-كېتىن اويگه
آيب كيرديم. اولرنى جايلاشتيريش اوچون خاتين نى چقيرديم. خاتين
كېلىب، سودالرنى كورگچ:

واى، نيمه لر كېلتيريپ سيز، دېب كوزى حيرتدن تورتته بولدى!

مېن اېسه:

نيمه بولدى، اجنه-مجنه كوردينگيز مى؟! بولرنيگ برچه سيني
اؤز قولىنگيز بيلن يازيلگن يادداشتينگيز يوزيدن بازاردن كېلتيرديم،
دېديم.

نيمه، قيسى يادداشت؟! مېن قچان سيزگه برنج يا كه بير قۇچاق

اسپلاق، دېگن اېديم؟!

بىلمەدەيم، نىمە يى كە يادداشتە يازىلگن اېدى، اۋشەنى ساتىب
آلدىم-دە!

وى سىز قورىمىنگ، اې! بو سودالرنى بىر آى آلدىن كېلتىرگن
اېدىنگىز-كو! قنى جوگارى ياغى؛ قنى سوت، لوبيا، اىپ و گروپلر؟!

اولىدە خاتىنىم مېن بىلن ھزل قىلەدى، دېب اۋىلەدەيم. بىراق
يۇق، او چىندىن ھم جدى طرزەدە مېنگە سۈزلە ياتگىنىنى سېزدەيم.
چونكە، كېلتىرگن سودالرىم نىنگ برچە سىنى حقىقتە ھم بىر آى
بورون اۋزىم بازاردن كېلتىرگىم اېندى اېسىمگە توشدى!

بونى قرەنگ كە، خاتىنىم بېرگن سۈنگى يادداشت قاغانى مېن
اېسى كېتگن، ساچىمنى ترە ياتگندە آىنەنىنگ آلدىدە اونوتىب، تۇغرى
بازارگە گېتىب من و او بېردە چۈنتىگىم دە قالگن بىر آى بورونى
يادداشتنى چىقەرىپ، اونىنگ يوزىدىن سودالرنى آلگن اېكن من!

نە چارە، "باشگە توشگىنى، كۈز ترتر" دېگنلىرى كىبى گناھ قىلگن
بالەدېك بۇزەرىپ تورىپ، حقىلى خاتىنىم نىنگ برچە منت و طئەنەلرىنى
جىم اېشىتىپ تورىشدىن اۋزگە علاجىم يۇق اېدى! بىراق بوندىن بوپان،
ھر بىر يادداشتنى سودا اىشى توگە گندىن سۈنگ، خودبى مېم بىر
محرم يادداشت اۋقىلگندىن سۈنگ كويدىرىلگىنى كىبى، مېن ھم
كويدىرىپ، كولىنى يۇق قىلىپ تشلەشىم كېرەكلىگىنى بىلىپ آلدىم!

تىغ بندلىك!

ايچكى اوروشلر پيئيدە قوماندانچە لردن بىرى بىراز ساوغاتلرنى
آلب، دم و دعاسى مشهور بولگن و تىغ بندلىك قىلىشده اوزاق-ياووق
قىشلاقلرده دانگ تره تگن بىر دعاخوان ملا قاشيگه بارىدى.
قوماندانچە، ساوغاتلرنى ملا حضورىگه پىشكش قىلىپ:

تقصير، سىزىنگ دعا و تعويدىنگىز آوازه سىنى كۇپ ايتىگن من.
منه، بىز خدا يۇلىگه اوروشىپ، جهاد قىلىپ يورىب بىز! اوق كار
قىلمسلىك اوچون مېنى يخشىلىپ اوقىب، بىرار تىغ بند تعويد هم
بىرسنگىز، دېب حضورىنگىزگه كېلدىم، دېدى.

ملا اېسه ساوغاتلرنى خرسنچىلىك بىلن آلب، قوماندانچە نى
يخشىلىپ اوقىدى و بىرته اوزون تعويد هم بېرىپ، بونى دايم
بۇينىنگىزگه تاقىب يورسنگىز، انشاءالله اوقدن امان قالهسىز، دېدى!

قوماندانچە جدا قووانىپ، ملاگه ينه بىر مقدار پول هم بېرىپ
جۇن بېتىدى. ا، شوندىن سۇنگ، دىنيقسه تىغ بندلىك تعويدىنى
بۇينى گه تاققندن كېين ايلگرىدن هم بىر نېچە برابر كۇپراق باتور و

ددیل بۇلیب، هر قنداق اوروش جبهه لریده قۇرقمىدن اوروشه بېرىدى.

كونلردن بىر كون جبهه ده قتيق بىر اوروش و آتشمه چاغیده، بو قوماندانچه گه کوتيلمه گنده اوزاقدن بىر اۇق كېلىب، بېلىدن قویى جنسى اعضالریگه تېگىب، قتيق يره لنتىرىدى. قوماندانچه اېسه عسکرلری ياردمیده زۇرغه اوروش معرکه سیدن جان سقلب، اۇزینی چيقه ریب اویى گه كېلىدى.

اویده قوماندانچه درددن تۇلغه نیب، بىر و كۆكکه نفرینلر ایتیب، غضب اوستیده ایكى نفر جنگچی سینی تیغ بند قیلگن ملاگه باریب، اونى تېزده الیب كېلىنگلر، دېب بویورىدى.

بىر پسدن سۇنگ، ملانى قوماندانچه حضوریگه حاضر قیلیدىلر. شونده، قوماندان ملاگه اچیق و غضب بیلن:

بو قنده ی تیغ بندلیک اېدی؟! اۇق تېگىب، بېلىمدن قویى نی ایشدن چيقردى-كو! دېدى.

شونده عاقبتی ایلگریدن بیلگن زیرک ملا هم بۇش كېلمه ی، قوماندانچه گه:

قوماندان صاحب، مېن بېلىنگیزدن یوقاری سینی "تیغ بند" قیلگن اېدیم، دېب جواب بېرىدى!!.... سرپل- یاز فصلی، ۱۳۸۴

تاتی لرمه شوی!

ایچکی اوروشلر اوجیگه چیقیب، کبسکین توس آلدی و نہایت، بیزنینگ شہریمیز ہم دولت مخالفلری (مجاہد لری) قوٰلیگه اؤتدی. دولت قوتلری ارقه گه چپکینیب، شہر و بیز شہرلیکلرنی تشلب قاجدیلر. شونده، دولتده ایشله یدیگن کیشیلر جان سقلش اوچون ہریاققه قاجیب، بپرکینیب، ترقلدیلر.

اؤشه پیتلرده مہن شہر مکتبلری نینگ بیریدہ معلم ابدیم و بپچارہ معلملرنینگ جانی، "کافر" و "کافر تریبہ لاوچی" تمغاسی طفیلی برچہ دن کؤرہ کؤپراق خوف آستیدہ ابدی. شو باعث، مہن ہم جان سقلب قالیش اوچون باغیمیز جایشگن شہردن تشقری قیشلاققہ قاجیب باریب، باغبانیمیزگہ پناہ اہلتدیم و کہلہ جک نیمہ بؤلر اہکن، دہب تشویش و اضطراب بیلن اؤشه بیردہ یشب توردیم.

اویدہ گیلر، محلہ و ادارہ لردہ برچہ قوم-قربنداشلر و خلص تانیش-بیلیشلریم، جملہ دن باغبانیمیز ہم دایم مہنی "معلم صاحب!" قیلر اہدیلر. شو باعث، بو حساس و قلتیس وضعیتنی نظرده توتیب، باغبانیمیزگہ:

بوندن بویان، اینیقسە مجاهدلر کەلگەندە هوش قیلینگ مەنی
هەبچ قەچان "مەلم صاحب!" دەب خەتاب قیلەنگ، دەب تەکیدەلەدیم.

بیراق، بو نەرسە گە رەعایت قیلەش و دايم مەنی "مەلم صاحب!"
دەب زەھنی اۋرگە نەب، تەلی قاتیب قالگن بەچراە باغبانیمزگە جەدا
قەیین کەچدی. چەونکە یاشی مەندن نەچە برابر بۋلگن قەری باغبان،
یاش خۋجە یینی نی "آھای!" یا "ای!" و یا "اوە!" یا "اکە!" دەپش گە
اصلا تەلی بارمس و یوزی بۋلمس ابدی. لەکن نە چارە، مەھمانی نینگ
جانینی اسرەب قالیش اوچون اۋرگە نەش گە اینتیلر ابدی.

بیر نەچە کون اۋتیب، مجاهدلر بو قیشلاقنی هەم تەکشیرر اېکنلر،
دەبگن اۋازە قیشلاقە تەرقلدی!

شەوندە مەن بو گەنی اېشیتیب، ینە تشویش گە توشیب، تینچیم
بوزیلدی. بونی قرە نگ کە، باشیمگە کەیب یورگن تومارچە گل زر
تاقیم گە اۋشە ییلی رەسم(مود) بۋلیب قالگن "یشە سین ئور انقلابی
قوماندانى!" دەبگن شەار تەکیلگن اېکن! مجاهدلر کەلیب بونی کۋرسەلر،
اۋلیشیم البتە کە حتمی ابدی!

بو نەرسە تشویش و قۋرقوویم نی ایگى برابر قیلدی و بوندن
قوتیلەش چارە سینى ایزلەى باشلەدیم. تاقى نی بىرار یاققە اولاق تیریب
تشلەى، دەبسم علاجیم یۇق ابدى. چەونکە مجاهدلر اۋلیدە باش یلنگ

كۆرىنىش ناقولەى و خوفلى ابدى! باشقە بىر تاقى يا كالاھ و يا باش كىيىمى ھم اۋشە پىت مېندە يۇق ابدى. انچە باش قاتىرىشدىن سۇنگ، نھايت اۋزىمچە معقول بىر يۇلنى اۋىلب تاپدىم. يعنى اگر تاقىم نى باغبانىمىز تاقىسى بىلن المشسىم، بو مخمىصەدن آسانگىنە قوتىلەمن و باغبانىمىزگە ھم مجاھدىلر اونچەلىك اعتبار بېرمەيدىلر، دېب اۋىلەدىم.

شو نىت بىلن باغبانگە يىنگى تاقىم نى مقتب، اونىنگ تاقىسى بىلن المە شىش نىتىم بارلىگىنى اونگە ايتدىم. اصل گېدن خبرسىز بېچارە باغبان، ھرقنچە: مېنىنگ تاقىم اېسكى، چىرايلى اېمس، سىزگە مناسب كۆرىنمەيدى، دېسە ھم مېن كۇنمەدىم. نھايت، اونى اوشبو معاملەگە بىر عمللب كۇندىردىم.

بېچارە باغبان يورەگى بۇلر-بۇلمس سلەسىنى آچىپ، تاقىسىنى مېنگە بېردى و مېن اېسە اۋزىم نىكىنى اونگە بېردىم. بو معاملەدن اىچ -اىچىمدن نھايت راضى و خرسند بۇلدىم!

بىلەسىز مى بو ياغى نىمە بۇلدى؟

ھە، باغبان نىنگ تاقىسىنى آلىب اېندى باشىمگە قۇبەى، دېب قرەسم، اونىنگ تاقىسى نىنگ تېگرەگىدە "ىشەسىن خلق بويوك رھبرى!" دېگن شعار تىكىلگن اېكن!!....

سرېل - ياز، ۱۳۸۴

آتم گە آلب بارە من!

بیر کیشی رمضان آییدە اپرتەلب تۆقوز-اۋن یاشلی اۋغلی گە پول
بېریب، دوکاندن کنجد حلوا کېلتیریشنی بویورییدی.

اۋغلی اېسە باریب دوکاندارگە پولنی بېریب، کنجد حلوا بېرینگ،
دبیدی.

شونده دوکاندار اونگە اچیق بیلن قرەب دبیدی:

کتە-متە آدم بۇلیب، اویالمه‌ی سن می رۇزەنی یېسن؟

یۇغ ای عمکی، نیمە دبیسیز؟! بونی آتە مگە آلب بارە من، دېب
جواب بېرییدی!



اىكى مخروط، بىر استوانه!

بىركونى مىرزا اكه اۋزى ايتگن شعرلردىن تۈله بىر كىتابچه نى مېنگە تاپشېرىپ، اوندە گى يازىلگن شعرلر قىسى قالب يا ژانرلردە يازىلگن لىگىنى معلوم قىلىپ بېرىشىم نى التماس قىلدى.

مېن اېسە اويگە بارىپ، كېچە سى كىتابچه نى ورقلب قرەب چىقسىم، مىرزا اكه ايتگن شعرلرنىڭ بىرارتە سى ھىم شعرىنىڭ غزل، رباعى، مۇخس، مۇسۇس، ... سىنگرى مەمۇل ژانرلر يا سىزىم، اۋلنگ، يار-يار، ... سىنگرى غەنەنوي و فولكلورىي وزنلر و قالبلرگە اصلا اۋشەمس و ھېچ قندەى عروس وزنلرگە ھىم تۇغرى كېلمس ابدى! شو باغث، مېن ھزل يوزەسىدن مىرزا اكه نىڭ ھىر بىر پرچە شعرى يانئىدە كُره، مخروط، مۇلث، مۇفرج الزاويە، مۇخلف الاضلاع، استوانە، ... سىنگرى ھندسى اتمە(اصطلاح) سۇزلرنى يازىپ، اېرتەسى كىتابچە نى مىرزا اكه گە قىتەرىپ بېردىم!

بىر ھفتە - اۋن كون اۋتېب، بىركونى اېرتە لب تانگ و قىتەدە حويلىمىز اېشىگى نى كىم دىر تقيىللىدى. تانگدە بوندەى و قتلى كىم

اېكن، قوم-قارىنداشلاردىن بىرگە خىدا قىلمە سىن بىرار يامان خادىئە يا
مىصىت يوز بېردى مىكن، دېب شاشە-پىشە اۋرنىمدن توردىم و
اېشىك تامان يوگوردىم. اېشىكنى اچىب قرەسم، اېشىك األدىدە مىرزا
اكە بىر نېچە ورق قاغازنى قۇلىدە توتىب تورگن اېكن. مىرزا اكە بىلن
تېز كۇرۇشىب، حال-احوال سۇرەشگندىن سۇنگ:

هە مىرزا اكە! بونداق وقت تانگ سحرده اويدن چىقىب سىز،
خىرىت مى اۋزى؟! دېب سۇرەدىم، او كىشىدىن تشوئش و اضطرابدىن
تۇلە اھنگ بىلن.

مىرزا اكە: هە خىرىت، دېب اۋتە ذوق و مىمنونىت بىلن:

معلم صاحب، شو هفتە دە مېن اىكى مخروط و بىر استوانە
اىتدىم، دېب قاغازلىرىنى مېنگە اوزەتدى!

بونى قرەنگ كە بېچارە مىرزا اكە انچە اۋىلب، باش قاتىرىب،
مېن هزل يوزەسىدىن اونىنگ شعرلىرىدىن بىرىگە "مخروط" و باشقەسىگە
"استوانە" دېب يازىب قۇيگن شعرلرگە اۋخشەتىب، شعر يازگن اېكن!!



باله کیم نیکی؟!

روایت قیلیشلیرجه، بیر کیشی بیر عده لرگه "لیلی" حقیده به تفصیل سؤزلب بېریدی. کپین آدملردن بیری حکایه نی باشدن- ایاغیگچه ایشیتیب، کلتفه فهملیگی اوچون توشینه آلمه‌ی: "لیلی ابرکک میدی یا عیال؟" دېب سؤره گن اېکن!!

بو واقعه آدملر اره سیده "مثل" گه ایله نیب، جوده کؤپ ایشله تیله دی. بونی قره نگ که بو واقعه زمانوی شکلده هم قوییده گیچه تکرارلنگن:

پارلمان مجلسلری نینگ کمیسیونلریدن بیریده "باله لر حقوقی" مسأله سی بؤیجه جلسه قیلینیب، آجندا حقیده وکیللر ایکی کون بحث و مناظره قیلیب اېمیشلر. اینیقسه، اؤلکه میزده بیچاره معصوم باله لرگه تورلی ستملر بؤلیب، اولر برچه انسانی حقلریدن محروم اېکنلیکلری و دولت نینگ پرواسیزلیگی قتیق تنقید قیلینیب دی.

بحثرلر توگه گندن سؤنگ، بیر ژورنالیست وکیللردن بیریدن سؤره بدی:

- وکیل صاحب! "باله لر حقوقی" باره سیده نیمه دیبیسز؟

وکیل صاحب حیرت بیلن:

- مین شو ایکی کون بحثلرده، باله کیم نیکی لیگینی بیلالمه دیم، دېب جواب بېرگن اېکن!!

دعای خیر!

قرینداشلریمیزدن بیرری وفات ایتیب، دفن مراسمیده اشتراک ایتیش ایتیش اوچون باشقه لر بیلن قبرستانگه باردیک. عادتگه کوره مسجد امامی میتنی کومیش جریانیده قرآن کریم دن تلاوت قیلماقده ابدی. دفن مراسمی توگب، شو بیلن بیرگه تلاوت هم توگه دی. کپین، امام مرحوم نینگ روحی شاد و جای فردوس برین بولسین! دېب دعا قیلدی.

معمولگه کوره محله آقسقالی، برچه اشتراکچیلرگه بیر دعا قیلینگ، دېب ایتدی.


امام قؤل کؤته ریب، خداوندن ازاق-یقیندن غمشریکلیک بیلدیریب کبلگن برچه برادرلریمیزنی ساغ-سلامت سقلب، ایشلریگه آمدلر بېرسین! دېب دعا قیلدی.

شو پیتده، توستدن ارقه دن کیم دیر، قبرکن برادرلریمیز شوکون جوده محنت چېکدیلر. شولرگه هم بیر دعای خیر قیلینگ، دېب التماس قیلدی.

شونده، امام ینه قؤل کؤته ریب:

خداوند شو قبرکن برادرلریمیزنی هم ساغ-امان سقلب، کسب و

کارلریگه برکات بېرسین! دېب دعا قیلدی!!



محمد کریم ذره عظیمی اؤغلی محمد حلیم یارقین
هجری ۱۳۲۹ ییلی سرپل ولایتی مرکزی سرپل
شهریده توغیلگن. او، لیسه دورینی هرات و کابل
دارالمعلمین لریده توگه تیب، هجری ۱۳۵۴ ییلی
کابل بیلیم یورتی، طبیعی بیلیم لر فاکولته سی نینگ
فیزیک بۆلیمی دن دیپلوم آلدی.

او، چمه سی ۴۰ ییل دن آشه اؤزبک فولکلوری،
ادبیاتی، تیلی، مدنیته همده طنز بۆیچجه قلم
تبره تیب کبماقده.

اونینگ علمی-تحقیقی اثرلری افغانستان، اؤزبکستان، ایران و تورکیه ده باسیلیب
چیققن. افغانستان، اؤزبکستان و ایران اؤلکه لریدن علمی-ادبی ساورین لر آلگن.

حلیم یارقین نینگ باسیلیب چیققن طنز کتابلری:

۱. وکالت دغدغه لری (اؤزبکچه)! کابل: ۱۳۸۶.
۲. ینگى رئیس هم کبلدی! (اؤزبکچه)، کابل: ۱۳۸۶.
۳. بیز اعلانلر تخته سی میز! کابل: ۱۳۸۶.
۴. ده یدی ایتلر کمپانی! (اؤزبکچه)، کابل: ۱۳۸۹.
۵. سؤکیش هم پول بۇلر اپکن! (اؤزبکچه)، کابل: ۱۳۸۹.
۶. حاجی تریشر! (اؤزبکچه)، کابل: ۱۳۹۲.
۷. بو اؤشه بیچاره گینه! جلال نورانی طنزلری نینگ اؤزبکچه ترجمه سی، کابل: ۱۳۹۲.
۸. راز تشنابها(دری)، "الازهر" نشریاتی، کابل: ۱۳۹۲.
۹. نمایش عجیب!(دری)، "الازهر" نشریاتی، کابل: ۱۳۹۲.
۱۰. کمپاین سگهای ولگرد(دری)، "الازهر" نشریاتی، کابل: ۱۳۹۲.